

唐書


卷一百八十六之九十一



CHINESE - JAPANESE LIBRARY OF
HARVARD - YENCHING INSTITUTE
AT HARVARD UNIVERSITY
JUL 30 1936

366

T 2455.21



Harvard College Library Imaging Services <http://imaging.harvard.edu>

唐書卷一百八十六

周王鄧陳劉趙一楊顧

列傳第百八十六

宋宋祁撰

皇明朝列大夫國子監祭酒

臣 良有

承直郎

司業

臣 向高等奉

勅重校刊

周寶字上珪平州盧龍人曾祖待選為魯城令安祿山反率縣人拒戰死之祖光濟事平盧節度希逸為牙將每戰得攻魯城者必手屠之歷左贊善大夫從李膺以徐州歸天子父懷義通書記擢累檢校工部尚書天德西城防禦使以徙城事不為宰相李吉甫所助以憂死

寶藉蔭爲千牛備身天平節度使殷侑嘗爲懷義參軍
寶從之爲部將會昌時遷方鎮才校入宿衛與高駢皆
隸右神策軍歷良原鎮使以善擊毬俱備軍將駢以兄
事實寶彊毅未嘗訕意於人官不進自請以毬見武宗
稱其能擢金吾將軍以毬喪一目進檢校工部尚書涇
原節度使務耕力聚糧二十萬斛號良將黃巢據宣歙
徙寶鎮海軍節度兼南面招討使巢聞出采石略揚州
僖宗入蜀加檢校司空時羣盜所在盤結柳超據常熟
王敖據崑山王一據華亭宋可復據無錫寶練卒自守
發杭州兵戍縣鎮判八都石鏡都董昌主之清平都陳

晟主之於潛都吳文舉主之鹽官都徐及主之新登都
杜稜主之唐山都饒京主之富春都文禹主之龍泉都
凌文舉主之中和二年進同中書門下平章事兼天下
租庸副使封汝南郡王寶和裕喜接士以京師陷賊將
赴難益募兵號後樓都明年董昌據杭州柳超自常熟
入睦州刺史韋諸殺之四年餘杭鎮使陳晟攻諸諸以
州授晟寶子璵統後樓都虜不能馭軍部伍橫肆寶亦
稍惑聲色不卹事以壻楊茂實爲蘇州刺史重斂人不
聊田令孜以趙載代之茂實不受命寶表留不聽乃殘
郭署汙垣牖去詔以王蘊代載載留潤州初鎮海將張

郁以擊毬事寶光啓初劇賊剽崑山寶遣郁領兵三百
戍海上郁醉而叛王蘊謂州兵還休不設備郁遂大掠
蘊嬰城守寶遣將拓拔從討定之郁保常熟因攻常州
刺史劉韋迎降衆稍集寶遣將丁從實督兵攻之郁走
海陵依鎮遏使高霸從實遂據常州及董昌徙義勝軍
節度使寶承制擢杭州都將錢鏐領州事宣州賊李君
旺陷義興守之是時右散騎常侍沈誥使至江南負田
令孜勢震暴州縣嗣襄王下令搜令孜黨寶收誥及趙
載殺之高駢領鹽鐵辟寶子佶爲支使寶亦表駢從子
在幕府駢爲都統寔不禮寶寶銜之帝在蜀淮西絕貢

賦謾言道浙西爲寶剽阻帝知其誣不直駢自是顯墮
駢出屯東塘約西定京師寶喜將赴之或曰高氏欲圖
公地寶未信駢遣人請會金山謀執寶寶答曰平時且
不聞境上會況上蒙塵宗廟焚辱寧高會時耶我非李
康不能爲人作功勳欺朝廷也駢遣人切讓寶亦詬絕
之會部將劉浩刁頹與度支催勘使太子左庶子薛朗
叛寶方寢外兵格鬪火照城中寶驚出諭曰爲吾用則
吾兵否則寇也六州皆我鎮何往不適乃自青陽門出
奔士大掠官屬崔綰陸鏐田倍皆死浩奉朝領府事寶
至奔牛埭駢饋以壅葛諷其且亡也寶抵于地曰公有

呂用之難方作無謂我卽奔常州依丁從實召後樓都
無一士至者錢鏐遣杜稜成及攻薛朗稜于建徽攻從
實聲言迎寶擊破賊君旺取船八百艘遂圍常州從實
奔海陵鏐具橐鞬迎寶舍樟亭未幾殺之不淹月而駢
爲畢師鐸所囚寶死年七十四贈太保鏐以杜稜守常
州文德元年拔潤州劉浩亡不知所在執朗剖其心祭
寶使阮結守潤州楊行密殺高霸而張郁丁從實皆死
初黃巢平時溥遣小史李師悅上符璽拜湖州刺史昭
宗時遷忠國軍節度使董昌反師悅連和與鏐有隙而
結好於行密安仁義次潤州復助之乾寧三年卒子繼

徽代以地附行密其將沈攸謂不可繼徽乃奔揚州陳
晟據睦州十八年死弟詢代立畏鏐忌已因徐綰亂與
田頎通鏐割桐廬隸杭州詢遂絕鏐攻蘭溪鏐使方永
珍擊詢天祐元年行密遣將闕昝陶雅救之執鏐弟鎰
大將王求顧全武等未幾鏐將楊習攻婺州詢乃奔揚
渥渥以金師會守之及鏐破衢州師會走鏐取其地
王處存京兆萬年人世籍神策軍家勝業里爲天下高
貲父宗巧射利侈靡自奉僮千人以此奮累除檢校司
空金吾大將軍遙領興元節度使處存自右軍鎮使歷
檢校刑部尚書定州制置使累遷義武節度使黃巢陷

京師處存號哭不俟詔分麾下兵二千闕道至山南衛
乘輿外約王重榮連盟進屯渭橋而涇州行軍司馬唐
弘夫亦屯渭北詔處存檢校尚書右僕射督戰俄拜東
南面行營招討使中和二年授京城東面都統每痛國
難未夷語輒流涕軍中多處存義愈爲之用素善李克
用又故婚好遣使十輩曉譬迎勸卒共平京師王鐸差
與復功以勤王舉義處存爲第一收城破賊克用爲第
二遷檢校司空復出兵三千屬大將張公慶會諸軍捕
巢泰山滅之進檢校司徒同中書門下平章事田令孜
討王重榮徙處存節度河中上書言重榮有大功不可

改易控諸侯之心不納起上道軍次晉州刺史冀君武
閉門不內而重榮拒詔處存臨事通便宜有大將風幽
鎮兵悍馬彊其地執也而易定介於其間侵軼歲至及
李匡威得志謀并取之處存善脩鄰驩內撫民有恩痛
折節下賢協穆太原以自助遠近同心歲時講兵與諸
鎮抗無能侵軋者累加侍中檢校太尉卒年六十五贈
太子太師諡曰忠肅三軍迹河朔舊事推子部由副使
爲留後昭宗從之累拜節度使加檢校司空同中書門
下平章事又進太保光化三年朱全忠使張存敬攻幽
州以瓦橋濘潦道祁溝關部方與劉守光厚乃昇叔處

直兵擾其尾令騎將甄瓊章次義豐而存敬游奔騎已
至且戰且引十餘里執瓊章而氏叔琮下深澤執大將
馬少安圍祁州屠之斬刺史楊約休兵十日處直壁沙
河存敬軍河北挑戰處直不出涉河乃戰處直大敗亡
大將十五士死者數萬存敬收械甲以賦戰士而焚其
餘遂圍定州部斬親吏梁汶移書存敬且請盟俄而外
郭陷部以其族奔太原使處直主留後全忠亦至處直
辭曰敝邑事上未嘗不忠事鄰未嘗不禮弗虞君之見
攻也全忠責何故事克用答曰太原藉兄弟之舊修好
往來常道也君苟爲罪請收圖全忠許之處直以從孫

爲質上所持節卽獻絹三十萬具牛酒犒師存敬取成
而還全忠表處直爲節度留後檢校尚書左僕射部至
太原克用表爲檢校太尉卒處直字允明天復初爲太
原郡王

鄧處訥字冲韞邵州龍潭人少從江西人閔頊防秋安
南中和元年還道潭州逐觀察使李裕召諸州戍校徇
曰天下未定今與君等安護州邑以待天子命若何衆
稱善乃推頊爲留後請諸朝僖宗方在蜀遣使者撫慰
當是時撫州刺史鐘傳據洪州議者欲二盜相噬卽復
置鎮南軍擢頊節度使頊悟不受命更爲檢校尚書右

僕射欽化軍節度使以處訥爲邵州刺史朗州武陵人
雷滿者本漁師有勇力持武陵諸蠻數叛荆南節度使
高駢擢滿爲裨將將鎮蠻軍從駢淮南逃歸與里人區
景思獵大澤中嘯亡命少年千人署伍長自號朗團軍
推滿爲帥景思爲司馬襲州殺刺史崔翥詔授朗州兵
馬留後歲略江陵焚廬落劫居人俄進武貞軍節度使
先是陬溪人周岳與滿狎因獵宰肉不平而鬪欲殺滿
不克見滿已據州悉衆趨衡州逐刺史徐顥詔授衡州
刺史石門峒酋向瓌聞滿得志亦集夷獠數千屠牛勞
衆操長刀柘弩寇州縣自稱朗北團陷澧州殺刺史呂

自收自稱刺史項旣疆大且治人有恩哀徐顥窮率兵
納之向瓌召梅山十峒獠斷邵州道項掩其營周岳羸
軍誘戰項墮伏中故大敗淮西將黃皓殺項岳聞亂以
輕兵入潭州自稱欽化軍節度使處訥聞之哭諸將入
弔處訥曰與君等荷僕射恩若合一州之兵問周岳罪
奈何衆曰善於是礪甲訓兵積八年結雷滿爲援攻岳
斬之自稱留後昭宗詔拜武安軍節度使不三日會劉
建鋒馬殷兵至攻澧陵處訥遣邵州豪傑蔣勛鄧繼崇
率兵三千斷龍回關勛以牛酒犒師殷說勛曰劉公身
智絕人術家言當與翼軫間今精兵十萬攻必下戰必

克收敗衆以餉軍公哀鄉兵扞關殆矣不知下之富貴
可得也勛謂然又其下畏建鋒虐夜棄甲走建鋒至關
曰此天意也盡用邵旗鎧趨潭州守者以爲勛軍納之
既入處訖方宴執而殺之建鋒許勛賞未及行遣請弗
許勛怒幸鄧繼崇攻湘鄉取邵州進壁定勝武安建鋒
使殷督諸將擊之殷大敗走江許鄉人夏侯陟教殷以
奇兵出迪田踰澗山據江爲壁伏兵于莽誘勛度江勛
見士未陣爭出鬪殷分兵襲其壁塵瀕江軍夾擊勛大
敗拔定勝一壁進圍邵州未下而建鋒死殷代爲節度
使勛請和不許卒禽勛斬之是時道州蠻酋蔡結何庾

衡人楊師遠各據州叛宿人魯景仁從黃巢爲盜至廣
州病不能去以千騎留連州衆飢從蔡結求糧乃相倚
杖與州戍將黃行存誘工商四五百人據連州郴人陳
彥謙殺刺史董岳發官帑募士自稱都統勝兵四千零
陵人唐行旻乘巢亂脅衆自防盜永州殺刺史鄭蔚與
景仁合從數遣謀殷虛實完壘自守殷遣將李瓊攻永
州殺行旻李瑋攻道州蔡結約峒獠爲援久不勝謀曰
蠻所恃林藪耳乃屯大川伐山焚林獠驚走城陷執蔡
結何庾殷斬之李瓊出來陽常寧攻郴州陳彥謙出戰
軍亂不能陣斬彥謙進圍連州魯景仁乘城守三日不

下夜焚其門入之景仁自刺死項字公謹蒲字秉仁岳
字峻昭行旻字昌圖蒲不脩飭每宴使客抵寶器澤中
曰此水府也蛟龍所憑吾能沒焉乃裸入水俄取器以
出累遷檢校太尉同中書門下平章事天復元年卒子
彥威自立間荆南節度使成汭兵出襲江陵入之焚樓
船殘墟落數千里無人跡弟彥恭結忠義節度趙匡疑
以逐彥威據江陵匡凝弟匡明擊之還走朗州

陳儒江陵人世爲牙右職庸明元年以鄭紹業爲荆南
節度使時朗州刺史段彥謩方據荆南紹業憚之踰半
歲乃至僖宗入蜀召紹業還行在以彥謩代節度彥謩

與監軍朱敬玫不平謀殺之敬玫寬先率兵入其府彥
謩方寢拔劍縋城奔親軍壘不得入彥謩曰而等負我
俄見害親屬僚佐皆死敬玫以少尹李燧爲留後且誣
彥謩以罪帝遣中人似先元錫王魯琪慰撫密戒曰若
敬玫可誅誅之以爾代而魯琪爲副敬玫盛兵出迎元
錫等不敢發而還復詔鄭紹業爲節度使逗留不進敬
玫署儒領府事明年遷檢校工部尚書爲節度使進檢
校右僕射敬玫有悍卒三千號忠勇軍暴甚儒不能制
初紹業將申屠琮率兵五千援京師旣歸儒告以忠勇
燒治琮請除之大將程君從聞之率衆奔澧州琮追斬

百餘人軍乃潰已而琮復顧軍雷滿三以兵薄城儒厚
啖以利乃去淮南將張瓌韓師德據復岳二州自署刺
史儒請瓌攝行軍司馬師德攝節度副使共擊滿師德
兵上峽大略去瓌引兵入逐儒儒將奔行在旣又劫還
囚之瓌滑州人暴勇而殘荆故將夷戮幾盡時以楊玄
晦代敬玫監軍召敬玫還成都懼帝治前罪稱疾自解
前此數殺大將富商故積賄每曝衣紈繡不可計瓌見
心動遣卒賊之敬玫衣黃衣盜刺其腹死秦宗言來寇
馬步使趙匡欲奉儒出瓌覺之殺匡而絕儒食七日死
瓌固壘二歲樵蘇皆盡米斗錢四十千計杯而食號爲

通腸疫死者爭啗其尸縣首于戶以備饑軍中甲鼓無
遺夜擊闔爲警宗言不能下乃解去二年宗權遣趙德
諲攻瓌瓌求救於歸州刺史郭禹禹率峽州刺史潘章
解圍明年德諲又至諸將困于戰城遂陷瓌死人无識
者併尸于井復州長史陳璠從瓌至江陵密斷瓌首置
囊中走京師獻之援安州刺史

劉巨容徐州人爲州大將龐勛之反自拔歸授埭橋鎮
遏使浙西突陣將王郢反攻明州巨容以筒箭射郢死
拜明州刺史徙楚州圍練使黃巢亂江淮授斬黃招討
副使徙襄州行軍司馬檢校右散騎常侍巢據荆南俄

遷山南東道節度使以扞巢屯圍林江西招討使曹全
晟與巨容守荆門關與賊戰巨容僞北巢追之伏與林
檄聞賊大敗執賊將十三人轉鬪一舍虜獲不可計巢
泮江東奔巨容追之幸十俘八以功遷檢校禮部尚書
諸將欲乘勝追斬巢巨容止曰朝家多負人有危難不
愛惜官賞事平卽忘之不如留賊爲富貴作地諸將謂
然故巢復熾及陷兩京巨容合諸道兵討之授南面行
營招討使累兼天下兵馬先鋒開道供軍糧料使檢校
司空封彭城縣侯巨容明吏治時僖宗在蜀公卿多因
巨容護赴行在山南西道節度使鹿晏弘爲禁軍所逐

引麾下東出襄鄧秦宗權遣趙德諲合晏弘兵攻襄州
巨容不能守奔成都始揚州人申屠生能化黃金高駢
客之爲呂用之所譖亡奔襄漢駢遣吏捕得生見巨容
自言其術巨容留不遣田令孜之弟道襲州巨容出金
夸之及在蜀匿生使術不得傳令孜恨之龍紀元年殺
巨容夷其宗生并死巨容部將馮行襲者均州武當人
以謀勇稱里中中和初鄉豪孫喜聚衆數千人謀攻城
行襲伏士江隩以單舟迎喜曰州人思得將軍義矣顧
將軍兵多必剽掠若留衆江北以輕騎進我爲鄉導城
可下喜信之旣度江吏出迎伏甲興行襲擊喜斬之衆

皆潰行襲乘勝逐刺史呂燁據均州巨容因表爲刺史
帝在蜀均之右有長山當襄漢貢道有劇賊據險劫獻
物行襲平之武定節度使楊守忠表爲行軍司馬使領
兵搃谷口以通秦蜀鳳翔李茂貞養子繼臻據金州行
襲攻拔之昭宗卽授金州防禦使時山南西道節度使
楊守亮將襲京師道金商行襲逆戰破之就擢戎昭軍
節度使朱全忠圍鳳翔神策中尉韓全誨遣中人二十
輩督江淮兵過其州行襲方附全忠盡殺之收詔書送
全忠天祐二年王建遣將王思綰攻行襲敗其兵州大
將金行全出降行襲奔均州建以行全爲子更名宗朗
授觀察使以渠巴開三州隸之宗朗不能守焚郭邑去
全忠以行襲不足禦建遣別將屯金州行襲議徙戎昭
軍於均州以金房爲隸全忠以金人不樂行襲以馮恭
領州罷防禦使而廢戎昭軍

趙德諲蔡州人從秦宗權爲右將以討黃巢功授申州
刺史光啓初與秦誥鹿晏弘合兵攻襄州節度使劉巨
容奔成都宗權假德諲山南東道節度留後進攻荆南
悉收寶貨留裨將王建肇守之遣人纔數百室明年歸
州刺史郭禹來討建肇納之奔黔州德諲失荆南又度
宗權必敗舉地附朱全忠全忠方爲蔡州四面行營都

統卽表以自副加忠義軍節度使宗權平加中書令封
淮安郡王卒子匡凝嗣字光儀由唐州刺史自爲山南
東道節度留後昭宗卽授節度使不三年以威惠聞累
遷檢校大尉兼中書令匡凝矜嚴盛飾前後持鑑自照
全忠之敗清口匡凝與奉國節度使崔洪河東李克用
淮南楊行密約合兵攻全忠會方城鎮遏使度軫奔全
忠發其謀全忠移書切責使氏叔琮攻唐州刺史趙匡
璠降進圍隋州執刺史趙匡璘斬首五千級拔鄧州執
刺史國湘匡凝懼乞盟全忠使親將陳俊王紳入叔琮
軍崔洪留之紳亡歸洪與行密欲邀友恭軍不克會河

東客伊超使淮南還過蔡洪亦留之因是并俊送全忠
以部將苛拘爲解遣兄賢入質全忠還之質洪子於汴
全忠使賢調蔡州卒二千出戍將行大將崔景思不悅
殺賢洪懼驅民趨申州遂奔行密麾鼓亘百餘里武昌
杜洪邀之弗及蔡士多亡去從者纔二千人天祐元年
封匡凝爲楚王時諸道不上供唯匡凝歲貢賦天子全
忠方圖天下遣人諭止之匡凝流涕曰吾爲國屏翰渠
敢有他志副使王筠勸絕全忠全忠怒出兵攻之弟匡
明大破汴軍於鄧州因勸匡凝與王建連和及荆南成
汴敗匡凝取江陵表匡明爲荆南節度留後有詔拜檢

唐書卷一百一十三 列傳 十三
校司徒荆南節度行軍司馬全忠以其兵分可圖也乃使楊師厚攻匡凝自將中軍繼之屯臨漢匡凝遣客謝囚不遣敗荆南救兵俘其將全忠循江而南師厚繇陰谷伐木爲梁匡凝以兵二萬瀕江戰大敗乃燔州單舸夜奔揚州行密見之曰君在鎮輕車重馬輸於賊今敗乃歸我邪筠自殺全忠以師厚爲山南東道節度留後遂趨江陵匡明亦謀奔淮南子承規諫曰昔諸葛兄弟分仕三國若適揚州是自取疑也匡明謂然乃趨成都王建待以賓禮授武信軍節度使分其衆爲崇義勇義順義廣義四都全忠遂有荆南

楊守亮曹州人本姓訾名亮與弟信俱從王仙芝爲盜亮身長七尺餘色如鐵仙芝死又事徐唐莒劫剽洪饒二州楊復光平江西得其兄弟養爲假子以信養於弟復恭家曰守亮守信復恭收京師守亮以戰多拜山南西道節度使檢校太保守信興平軍節度使並同中書門下平章事復恭又以假子守貞爲龍劔節度使守忠爲武定軍節度使守厚爲綿州刺史初朱玫取興鳳州號州刺史滿存以兵赴行在復收二州昭宗擢爲感義軍節度使累檢校司徒同中書門下平章事與復恭四假子及利閬觀察使席儔等共攻王建建軍已圍楊晟

分軍逼守厚軍未成列而敗先是守貞守忠聞建兵出拔衆奔綿州并力共攻東川弗勝建將華洪以兵萬人壁綿州之郊敗守忠守厚二人分道行收兵趨閬州始復恭敗依守亮而鳳翔李茂貞郃寧王行瑜鎮國韓建等共劾守亮納叛人請以鎮兵討之茂貞自爲興元節度使以書詰責宰相帝爲削守亮官爵因詔茂貞問罪蒲存來救不克以衆入興元茂貞拔興鳳洋三州破守亮於西乘勝入興元復恭挾諸假子及存奔閬州洪進圍之帝以徐彥若帥鳳翔以興元授茂貞茂貞不肯拜帝乃以其子繼密爲興元節度使俄而洪拔閬州守亮等皆挺身走將北奔太原趨商山飢甚丐食于野爲進戍所縛見韓建守亮視建左右八百人皆常隸已誣建曰此屬吾養之素厚無一爲我死公無費衣食不如殺之建許諾復曰公幸貸我俾生見天子陳先人功萬有一不死建檻車送京師吏縛以帛內毬于口帝御延喜樓問反狀守亮不得語頷而已左右白服罪卽執獻太廟斬獨柳下梟于市守厚死巴州麾下兵多歸王建存奔京師爲左武衛大將軍

楊晟不詳宗系隸鳳翔軍節度使李昌符畏其勇欲殺之妾周撻使亡去隸神策軍爲都校僖宗在陳倉郃寧

朱玫遣萬騎合昌符追行在乃擢晟感義軍節度使檢校司空守大散關攻兵攻關晟數卻戰潘氏遂大敗內外無固志帝更徙興元晟西奔攻取興鳳二州晟襲文州逐刺史據成龍茂等州王建攻成都田令孜以晟故將與連和假威戎軍節度使守彭州晟擊建無功引還且畏建圖已乃約山南西道節度使楊守亮兄弟合謀拒建掠新繁焚漢州又攻東川顧彥暉為建兵所逐建使王宗裕率騎五萬圍晟食四郊麥掠民資產晟假子實以騎八千降於建建以奇兵襲楊守厚等皆亡去晟開門決戰大敗遂約降建饋十羊晟曰以我為杞上肉

乎不出建築甬道屬陣以入斬晟首晟有仁心下懷其恩雖城中食盡無叛者初昌符死晟得其妾周母事之周請為妻晟固辭旦夕問省乃視事愛將安師建者勇而有禮既就執建顧曰爾報楊司徒足矣能從我乎謝曰司徒誓同死生不忍復戴日月三謂不回乃戮之顧彥朗彥暉者豐州人並為天德軍小校其使蔡京以兄弟有封侯相每厚禮之使子贈資稍稍進秩黃巢亂長安率軍同復京師彥朗遷累右衛大將軍光啓中擢拜東川節度使檢校太保同中書門下平章事至劔門陳敬瑄使吏奪其節彥朗不得入保利州敬瑄誣劾彥

朗擅興兵掠西境僖宗下詔申曉講和乃得到軍署彥
暉漢州刺史初楊守亮忌壁州刺史王建凶暴欲逐之
建聞合溪洞豪僧取閬州擊利州刺史走卽據二州守
亮不能制彥朗與建雅舊陰助資饗建攻成都彥朗挾
故憾與并力道路鄣梗敬瑄告難于朝帝詔和解又敕
李茂貞鐫諭會彥朗卒彥暉自知留後明年爲節度使
中人送節爲綿州刺史楊守厚所留守厚發兵攻梓州
彥暉告急于建建使李簡救之戒曰賊破并取彥暉無
須再往也簡破守厚軍彥暉辭疾不克取建素有吞噬
心以彥朗與婚媿久未忍及彥暉則交好愈疏而境上

關賊相誓詬建怒景福元年遂攻彥暉彥暉請救於楊
守亮遣楊子彥戍梓執建大將王宗弼彥暉責曰王公
何以見討君爲大將不諫云何宗弼謝罪卽解縛使就
館轡幕衾服皆具更養爲子改名琛明年建將華洪破
綿州守厚走得彥暉節時詔已進彥暉檢校司空東川
節度使矣乾寧二年昭宗在石門督彥暉建赴行在建
率兵二十萬次綿州卽劾彥暉劫輜運回襲之彥暉不
敢出但遣人塞建舟路建遂擊取巴閬蓬渠遂果龍利
八州帝遣中人爲兩川宣諭協和使建奉詔還而兵不
解彥暉謀窘因大略漢眉資簡等州李茂貞亦欲爭其

地使子興元節度使繼密引軍救彥暉以窺東川四年
華洪率衆五萬攻彥暉取渝昌普三州壁梓州南敗彥
暉兵奪鎧馬八百凡五十戰圍遂固帝仍遣左諫議大
夫李洵諭止建拒命帝以嗣郟王戒丕鎮鳳翔徙茂貞
代建皆不奉詔梓有鏡堂世稱其麗彥暉嘗會諸將堂
上養子瑤尤親信彥暉以所佩劔號疥癆賓佩之使侍
左右嘗語諸將曰與公等生死同之違者先齒疥癆賓
衆曰諾及圍急瑤請聚親信飲得同死彥暉顧王琛曰
爾非我舊可自求生指頰坦令逸彥暉手殺妻子乃自
刎宗族諸將皆死麾下兵猶七萬初韋昭度爲招討使
彥暉建皆爲大校彥暉詳緩有儒者風建左右髡髮黥
面若鬼見者皆笑至是錄笑者皆殺之私署洪爲東川
節度留後

贊曰詩云戎狄是膺荆舒是懲嫉其爲中國之害也春
秋之世楚滅陳鄭而卒復其禮聖人善之處存平黃巢
定京師功冠諸將昭宗嘗有意都襄陽依趙凝以自全
大抵唐室屏翰皆爲朱溫所翦覆過於夷狄荆舒之爲
害也甚矣

唐書卷一百八十六終

唐書卷一百八十七 二王諸葛李孟列傳第一百二十二

宋宋祁撰

皇明朝列大夫國子監祭酒 臣蕭良有

承直郎 司業臣葉向高等奉

勅重校刊

王重榮太原祁人父縱太和末為河中騎將從石雄破

回鶻終鹽州刺史重榮以父任為列校與兄重盈皆以

毅武冠軍擢河中牙將主伺察時兩軍士干夜禁捕而

鞭之士還訴於中尉楊玄寔玄寔怒執重榮讓曰天子

爪士而藩校辱之答曰夜半執者姦盜孰知天子爪士

具言其狀玄寔歎曰非爾明辨孰由知之更諉於府擢
右署重榮多權詭衆所嚴憚雖主帥莫不下之稍遷行
軍司馬黃巢陷長安分兵略蒲節度使李都不能支乃
臣賊然內憚重榮表以自副地邇京師賊調取橫數使
者至百輩坐傳舍益發兵吏不堪命重榮脇說都曰我
所詭謀紆難以外援未至今賊哀責日急又收吾兵以
困我則亡無日矣請絕橋嬰城自守不然變生何以制
之都曰吾兵寡謀不足絕之禍且至願以節假公遂奔
行在重榮乃悉驅出賊使斬之因大掠居人以悅其下
天子使前京兆尹竇滂間道慰其軍因詔代都重榮率
滂至大饗士倡言曰天子以大臣守土誰得逐之爲我
疏首惡衆無敢對重榮佩刀歷階曰首謀者我也尚
誰索目滂吏趣具騎滂即奔還重榮遂主留後賊使健
將朱溫以舟師下馮翊黃鄴平衆自華陰合攻重榮重
榮感勵士衆大戰敗之賊棄糧仗四十餘艘即拜檢校
工部尚書爲節度使以功檢校太尉同中書門下平章
事封琅邪郡王累加檢校太傅中人性悍酷多殺戮少
縱舍嘗植大木河上內設機軸有忤意者輒置其上機
發皆溺嘗辱部將常行儒行儒怨之光啟三年引兵夜
攻府重榮亡出外詰旦殺之推立重盈重盈前此已歷

汾州刺史黃巢度淮擢陝虢觀察使重榮據河中三遷
檢校尚書右僕射即拜節度使未幾同中書門下平章
事及代重榮留長子珙領節度事入殺行儒軍復安昭
宗立進太傅兼中書令封琅邪郡王父子兄弟相繼帥
守而從子蘊亦爲忠武節度使乾寧二年重盈死軍中
以其兄重簡子珂出繼重榮故推爲留後自重榮傳珂
凡二十年

諸葛爽青州博昌人爲縣伍伯令答苦之乃亡命浮沉
里中龐勛反入盜中爲小校勛勢賊率百餘人與泗州
守將湯羣自歸累遷汝州防禦使李琢討沙陀於雲州

表爲北面招討副使徙憂綏銀節度使檢校尚書右僕
射黃巢犯京師詔率代北行營兵入衛次同州降賊僞
署河陽節度使代羅元杲元杲者本神策將狀短陋倚
中官勢剽財輸京師凡鉅萬人怨之爽至募州人戰衆
不從相率迎爽元杲奔行在爽間道奉表僖宗以自明
詔拜節度使李克用援陳許道天井關爽懼不肯假道
出屯萬善克用自河中趨汝洛爽累授京東南面招討
諸行營副都統左先鋒使兼中書門下平章事明年詔
爽爲東南面招討使伐秦宗權表李罕之自副爽雖興
庸廝善吏治法令澄一人無愁咨擢累檢校司空光啓

唐書卷一百一十七
二年卒其將劉經與刺史張言共立爽子仲方爲留後
爲蔡賊孫儒所攻奔於汴儒取孟州

李罕之陳州項城人少拳捷初爲浮屠行丐市窮日無
得者抵鉢 祇枝去聚衆攻剽五臺下先是蒲絳民壁
摩雲山避亂羣賊 攻不克罕之以百人徑拔之衆號
李摩雲隨黃巢度江降於高駢駢表知光州事爲秦宗
權所迫奔項城收餘衆依諸葛爽署懷州刺史攻河陽
有功克用表罕之爲節度使同中書門下平章事有詔
與屬籍克用討王行瑜表罕之副都統檢校侍中行瑜
誅封隴西郡王檢校太尉兼侍中罕之恃功多嘗私克

用愛將蓋寓求一鎮寓爲請克用不許曰鷹鷂飽則去
矣我懼其翻覆也光化初昭義節度使薛志勤卒罕之
夜襲潞入之自稱留後報克用曰志勤死懼它盜至不
俟命輒屯於潞克用遣李嗣昭先擊澤州拘罕之家屬
送太原罕之攻沁州執刺史守將送款於汴全忠表罕
之昭義節度使命丁會援之與嗣昭戰含口嗣昭不利
葛從周取澤州嗣昭又攻罕之罕之暴得病不能事會
代戍全忠更以罕之節度河陽三城卒於行年五十八
嗣昭復取澤州

王敬武青州人隸平盧軍爲偏校事節度使安師 中

和中盜發齊祿間遣敬武擊定已還即逐師 自爲留
後時王鐸方督諸道行營軍復京師 制授敬武平
盧節度使趣其兵使西及京師平進檢校太尉同中書
門下平章事龍紀元年卒子師範年十六自稱留後嗣
領軍

孟方立邢州人始爲澤州天將井戍將稍遷游弈使中
和元年昭義節度使高潁擊黃巢戰石橋不勝保華州
爲裨將成鄰所殺還據潞州衆怒方立率攻鄰斬之自
稱留後擅裂邢洺磁爲鎮治邢爲府號昭義軍潞人請
監軍使吳全勗知兵馬留後時王鐸領諸道行營都統

以潞未定墨制假方立檢校左散騎常侍兼御史大夫
并邢州事方立不受因全勗以書請鐸願得儒臣守潞
鐸使參謀中書舍人鄭昌圖知昭義留事欲遂爲帥僖
宗自用舊宰相王徽領節度時天子在西河關雲擾方
立擅地而李克用窺潞州徽度朝廷未能制乃固讓昌
圖昌圖治不三月輒去方立更表李殷銳爲刺史謂潞
儉而人悍數賊大帥爲亂欲銷懦之乃徙治龍岡州豪
傑重遷有對言會克用爲河東節度使昭義監軍祁審
誨乞師求復昭義軍克用遣賀公雅李筠安金俊三部
將擊潞州爲方立所破又使李克脩攻取之殺殷銳遂

唐書卷一百一十七 列傳 五
并潞州表克脩爲節度留後龍紀元年克用使李罕之
李存孝擊邢攻磁洺方立戰琉璃陂大敗擒其二將被
斧鎖徇邢壘呼曰孟公速降有能斬其首者假三州節
度使方立力屈又屬州殘墮人心恐性剛急持下少恩
夜自行陴兵皆倨告勞自顧不可復振乃還引醜自殺
從弟遷素得士心衆遂推爲節度使留後大順元年存
孝以遷爲汾州刺史

贊曰以亂救亂跋扈者能之以亂不能救亂險賊者能
之蓋救亂似霸然而似之耳故不足與共功觀王重榮
寧不信哉破黃巢佐李克用平京師若有爲當世者俄
而奮私隙逼天子出奔雖馘朱玫仆僞襄王謂曰定王
室實卑之也身死部將手救亂而卒於亂重榮兩得之
不殺朱全忠而爲全忠誅絕其嗣宜矣餘皆庸奴下材
無所訾責云

唐書卷一百八十七終

唐書卷一百八十八 楊時朱孫列傳第一百一十三

宋宋祁撰

皇明朝列大夫國子監祭酒臣蕭良有

承直郎 司業臣葉向高 等奉

勅重校刊

楊行密字化源廬州合肥人少孤與羣兒戲常為旗幟戰陣狀年二十亡入盜中刺史鄭縻捕得異其貌日而且富貴何為作賊縱之與里人田頴陶雅劉威善僖宗在蜀刺史遣通章行在日走三百里如約而還秦宗權寇廬壽間刺史募殺賊差首級為賞行密以功補隊長

都將忌之俾出戍將行都將問所乏對曰我須公頭卽
斬之自爲八營都知兵馬使刺史走淮南節度使高駢
因表爲廬州刺史乃以田頴爲八營都將陶雅爲左衝
山將討定鄉盜駢將呂用之恐行密不可制遣俞公楚
以兵五千屯合肥名討黃巢而陰圖之行密擊殺公楚
秦宗權遣弟度淮取舒城行密破走之時張敖據壽州
許勅據滁州與行密拏戰又舒人陳儒攻刺史高濬濬
來告難行密未能定賊吳廻李本逐濬據其城行密虜
之取舒州爲勅所奪光啓二年張敖遣將魏虔攻廬州
大將李神福田頴破之楮城畢師鐸秦彥攻高駢呂用
之以駢命署行密行軍司馬督其兵進埒客袁襲說行
密曰高公耄昏妖人用權彥乃以逆除暴熾其亂公亟
應必得其地行密乃檄部州裒兵而東次天長而揚州
陷行密薄城而屯用之以兵屬之彥以騎兵背城戰行
密臥帳中令曰賊近報我俄而陷一屯別將李宗禮入
曰兵相迫戰且不利請堅壁徐引歸可也李濤怒曰以
順去逆何衆寡爲今尚何歸願以所部前死行密喜益
甲出戰俘殺如藉彥軍不出會駢死襲勸行密舉軍縞
素大臨三日進攻城未能下用之將張審晟詭伏西壕
殺闔者啓外兵彥軍疲守邏皆潰去行密入據揚州未

閱月孫儒奄至兵銳甚襲見行密曰公之入以少擊衆
室家未完若外被重圍情見勢殆不如避之行密執海
陵鎮遏使高霸殺之并其衆輦所收財歸于廬於是朱
全忠自爲淮南節度使遣將張廷範致命而授行密副
使以行軍司馬李璠知留後行密大怒廷範璠不敢入
全忠更請以行密知觀察留後當此時孫儒彊赫然有
吞吳越意行密欲遁保海陵襲勸還廬州治兵爲後計
行密乃還旣又謀趨洪州襲不可曰鍾傳新興兵附食
多未易圖也孫端據和州趙暉屯上元結此二人以圖
宣州我綽綽有力矣行密從之端暉次采石行密自

糝潭濟端等戰不勝襲勸行密速趨蜀山堅壁以須宣
人求戰示以弱待其怠一舉可禽宣將蘇瑋兵二萬對
屯行密不戰分奇兵伐木開道四出塘驚北遂圍宣州
刺史趙鏗糧盡親將多出降初行密有銳士五千衣以
黑繪黑甲號黑雲都又并盱眙曲溪二屯籍其士爲黃
頭軍以李神福爲左右黃頭都尉兵銳甚曲溪將劉金
策鏗必遁給曰將軍若出願自吾壘而偕鏗喜多遺之
金許妻以女明日譟城上曰劉郎不爲爾塔鏗宵遁獲
之鏗全忠故人也發使求之襲曰斬首送之無後慮乃
歸鏗首于汴昭宗詔行密檢校司徒宣歙池觀察使時

韓守威以功拜池州刺史行密表徙湖州以兵護送而李師悅在湖州與杭州刺史錢鏐戰不解蘇湖常潤亂甚行密雖得宣州而蔡儔爲孫儒所破以廬州降儒進攻行密行密復入揚州北結時溥扞儒全忠遣龐師古將兵十萬自潁度淮助行密敗於高郵行密懼退還宣州遣安仁義襲成及取潤州自將三萬屯丹陽仁義又取常州殺錢鏐將杜稜儒亦使劉建鋒奪潤常帝以杭州爲防禦使授鏐以宣州號寧國軍授行密節度使大順二年儒屯溧水循山構壁行密遣李神福屯廣德計曰兵倍不戰當避其銳驕之乃退舍儒衆以爲怯守者

懈神福夜襲走之儒將康旺取和州安景思取滁州神福擊降旺逐景思攻霽山屯破之禽儒將李弘章俄而田頽劉威爲儒所敗行密欲守銅官神福曰儒掃境以來利速戰宜堅壁老其師則我無敵矣又出輕騎絕賊糧道使前不得戰退無仰儲不亡何待於是行密以神福爲宣池都游弈使儒始乏食常熟名賊陳可兒間儒行密之闕竊入常州自稱制置使行密遣陶雅守潤州張訓入揚州因執楚州刺史以輕兵襲常州斬可兒孫儒圍行密宣州凡五月不解臺濛作魯陽五堰柁輕舸饋糧故行密軍不因卒破儒卽表田頽守宣城長驅入

揚州戰凡七年定八州生人將盡行密勞隱休息其下
遂安議出鹽茗畀民輸帛幕府高勗曰瘡破之餘不可
以加斂且帑貲何患不足若悉我所有易四鄰所無不
積日財有餘矣行密納之始選吏綏勸所部蔡儔以廬
州叛附朱全忠納孫儒將張顥而倪章據舒州與儔連
和行密遣李神福攻儔破其將儔堅壁不出顥超堞降
行密以隸袁積軍積請戮之行密愛其勇更置于親軍
未幾儔自殺行密先冢皆為儔發掘吏請夷發儔世墓
不許表劉威為刺史遣田頔攻歙州於是刺史裴樞有
美政民愛之為拒戰頔兵數却樞朝廷所命者食盡欲

降遣行密書請還京師行密以魯郃代樞州人不肯下
請陶雅代雅於諸將最寬厚以禮歸樞于朝是歲李神
福拔舒州倪章亡以神福為舒州刺史乾寧二年行密
襲濠州李簡重甲絕水縋而入執刺史張璠以劉金守
之進取壽州汴將劉知俊儲穀石碭將南襲張訓屯漣
水遣兵浮海掩得其廩知俊戰不勝因攻漣水大敗身
僅免詔拜行密淮南節度副大使知節度事檢校太傅
同中書門下平章事封弘農郡王董昌為錢鏐所攻來
告窮行密遣臺濠攻蘇州安仁義田頔攻杭州身督戰
別將張崇為鏐執行密欲嫁其妻答曰崇不負公願少

待俄而還自是行密終身倚愛明年五月破蘇州執鏐將成及以朱黨守之朱延壽拔斬光二州行密以霍丘當南北走集以邑豪朱景為鎮將景驍毅絕人諸盜莫敢犯汴將寇彥卿以騎三千襲之致全忠厚意景不許苦戰彥卿敗而去田頵魏約張宣共圍嘉興鏐大將顧全武救之執宣約逐頵於驛亭埭未幾秦寧節度使朱瑾率部將侯瓚來歸太原將李承嗣史儼史建章亦來奔行密推赤心不疑皆以為將於是兵銳甚彊天下帝惡武昌節度使杜洪與全忠合手詔殺行密江南諸道行營都統討洪汴將朱友恭聶金率騎兵萬人與張崇

戰泗州金敗瞿章守黃州聞友恭至南走武昌柵行密遣將馬珣以樓船精兵助章守友恭次樊港章據險不得前友恭鑿崖開道以彊弩叢射殺章別將遂圍武昌章率軍薄戰不勝友恭斬章拔其壁全忠率葛從周萬騎攻光州柴再用遣小校王稔以輕騎覘賊汴兵圍之候者請救再用曰稔必殺賊第無往稔解鞍自如暮依樾步戰殺傷多汴兵乃解時亡馬法峻稔追汴軍得馬乃還從周涉淮圍壽州而龐師古聶金以衆七萬壁清口朱延壽擊從周軍敗之行密欲汴圍解乃擊師古李承嗣曰公能潛師趨清口破其衆則從周不擊而潰行

密出車西門繇北門去以銳士萬二千齧雪馳迫清口
不進壅淮上流灌師古軍張訓自漣水來行密使將羸
兵千人爲前鋒師古易之方圍棋軍中不顧朱瑾侯瓚
以百騎持汴旌幟直入師古壘舞槩而馳訓亦登岸超
其柵汴軍大囂卽斬師古士死十八全忠聞之與從周
皆遁走追及壽陽大破之叩淠水方涉爲瑾所乘溺死
萬餘瑾徒屯安豐汴將牛全節苦鬪後軍乃得度會大
雪士多凍死賴州刺史王敬堯燎薪屬道汴軍免者數
千人未幾復圍壽州七日走馬珣收散卒三百自黃州
間道趨分寧絕山谷襲撫州鏐將危全諷列四壁皆萬
人珣謂諸將曰爲諸君擊中壁食其穀以歸乃夜擊之
全諷走明日珣高會廣旗幟伐鼓循山而下連營潰旣
還行密罵曰豎子不遂據其城邪光化元年秦裴取鏐
崑山鎮顧全武圍之行密諸將數敗全武遂圍蘇州臺
濛固守鏐自以舟師至濛食盡行密遣李簡將勳迎之
敗全武兵濛得還後軍潰裴援絕全武勸其降決水灌
城城壞裴乃降鏐喜具千人食以待旣至士不及百鏐
曰軍寡何拒之久裴曰糧盡歸死非僕素也初成及之
執行密閱其室唯圖書藥劑將辟爲行軍司馬固辭引
刀欲自刺行密乃止厚禮而歸之鏐亦遣魏約等還全

忠攻蔡州奉國節度使崔洪來丐師明年遣朱瑾率兵萬人攻徐州屯呂梁洪遂來奔會雨霖瑾引還行密攻徐州汴將李禮壁宿州以援全忠自將次輝州行密戰不勝乃解青州將陳漢賓擁兵送款行密王綰張訓周本率兵迎之漢賓中悔綰訓入見漢賓給麾下饗我不過日中若不至可攻城漢賓釋甲聽命光州叛行密自攻之汴將朱友裕來救撤圍還全忠諭馬殷成汭雷滿合兵攻行密汭滿猶豫汭惡殷事全忠掠其境滿來結好行密壁黃鄂間杜洪寘鳩丁酒于井棄城去行密知不入全忠又遣使者督殷汭滿連兵解圍行密還詔加檢校大尉兼侍中天復元年傳言盜殺錢鏐李神福急攻臨安顧全武列八壁相望神福伏軍青山僞若引去謀奔告全武悉衆躡之神福返關與伏夾攻斬首五千級執全武明日遂圍臨安鏐將秦昶以步兵三千降神福乃令軍中護鏐先墓禁樵采鏐遣使者厚謝神福以鏐不死臨安未可下納犒而還明年大將劉存率兵二萬戰艦七百伐湖南殷伏軍長磧洲以樓艦據上流乘風颺沙彊弩射之存軍殲行密歸顧全武於鏐鏐亦釋秦裴以報帝在鳳翔以左金吾大將軍李儼爲江淮宣諭使授行密東面諸道行營都統檢校太師守中書令

封吳王承制封拜且告難時已削奪全忠封爵詔西川
河東忠義幽州保大橫海義武大同八道攻之詔朱瑾
爲平盧節度使繇海州取青齊馮弘鐸爲感化節度使
出漣水攻徐宿使朱延壽圍蔡州田頔捍錢鏐行密討
杜洪馬殷以分全忠勢行密乃以李神福爲鄂岳招討
使劉存副之遣冷業攻馬殷杜洪戰屢敗嬰城請救於
全忠全忠使韓勅率步兵萬人屯澗口荆南節度使成
汭亦悉衆救洪神福逆戰敗之汭溺死勅引衆走冷業
屯平江爲三壁殷將許德勳以銳卒號定南刀夜襲業
擊二壁皆破禽業掠上高唐年而去是時杜洪困甚且

禽會田頔安仁義絕行密行密召神福存還計事洪復
振頔之敗更以臺濛爲宣州觀察使復遣神福存攻鄂
州順義軍使汪武與頔連和歙州刺史陶雅攻鍾傳兵
過武所迎謁縛武於軍無錫當浙衝行密使票將張可
棕守之鏐勁兵三千夜襲城可棕以百騎擊走之吏皆
賀答曰未也方勞諸軍一戰乃蔽火斂旗以須覘者以
告鏐兵復至可棕大破之臺濛卒行密以子渥爲宣州
觀察使天祐二年王彥章李德誠拔潤州殺安仁義以
王茂章爲潤州團練使聶彥章等卒舟師復伐殷攻岳
州許德勳詹佶以舟千二百柁入蛤子湖瑋山之南爲

木龍鎖舟夜徙三百舸斷楊林岸彥章入荆江將趨江陵佶躡之德勳以梅花海鵲迅舸進斷木龍舟蔽江車弩亂發執彥章溺死萬人殷釋彥章還德勳謂曰爲我謝吳王僕等數人在湖湘不可冀也行密寬易善遇下能得士死力每宴使人負劔侍陳人張洪因以劔擊行密不中近將李友禽斬之佗日侍劔如故行密蚤出有盜斷馬缺不之問以故人人懷恩始乘孫儒亂府庫殫空能約已省費不三年而軍富雄嘗過楚州臺濛盛供以待之行密一夕去遺衣臥內皆經補浣濛還之行密曰吾興細微不敢忘本君笑我邪濛大慙登城見王茂章營第曰天下未定而茂章居寢鬱然渠肯爲我忘身乎茂章遽毀損方帝困鳳翔再遣使督兵以爲行密可充全忠者然兵至宿州給言糧盡乃還全忠脅帝東遷行密恥憤被病全忠亦知天子倚行密爲重乃弑帝以絕人望行密聞之發喪不視事三日因是病篤召將吏付家事問嗣於其佐周隱對曰宣州司徒易而信讒唯淫酬是好不可以嗣不如擇賢者時劉威以宿將有威名隱意屬威行密不答因以王茂章代渥使亟還行密召所親嚴求曰我使周隱召吾兒而不至柰何求往見隱召檄仍在凡始渥守宣州押牙徐溫王令謀約渥曰

王且疾而君出外此殆姦人計他日有召非我二人勿應也及是二人以符召渥渥至行密承制授檢校太尉同中書門下平章事淮南節度使留後行密諭渥曰左衙都將張顥王茂章李遇皆怙亂不得爲兒除之卒年五十四遺令穀葛爲衣桐瓦爲棺夜葬山谷人不知所

在諸將諡曰武忠張顥議歸都統印於宣諭使李儼行節度事諸將畏顥無敢對渥流涕騎軍都尉李濤曰都統印先帝所以賜王父子安得授人諸將唯唯顥投袂去乃共請於儼承制授渥兼侍中淮南節度副大使東面諸道行營都統封弘農郡王渥好騎射初與許玄膺爲刎頸交及嗣位事皆決之諸將莫敢忤渥求王茂章親兵不得及去宣輦帷帝以行茂音嫚罵不與踰年遣兵五千襲之茂章奔杭州秦裴執鍾匡時渥授以江西制置使朱恩勅范師從陳鏞以兵戍洪州渥爲張顥所制二人者渥腹心也顥脅以爲有異謀遣陳祐疾馳懷短兵微服入秦裴帳中裴大驚命飲召三將入皆色動酒行祐數其罪皆斬之渥召周隱曰君嘗以孤爲不可嗣何也隱不對遂殺之

贊曰行密興賤微及得志仁恕善御衆治身節儉無大過失可謂賢矣然所據淮楚士氣剽而不剛行密無霸

材不能提兵爲四方倡以興王室。孰視朱溫劫天子而東謀窮意沮。僨死牖下。可爲長太息矣。

時溥徐州彭城人爲州牙將黃巢亂京師節度使支詳遣溥與陳璠率兵五千西討次河陰軍亂剽居人溥招戰其衆引還屯境上疑不敢歸詳以牛酒犒士約悉贖其罪軍乃入共推溥爲留後逐詳客館溥厚具貲裝遣璠護還京師夜駐七里亭璠擅殺詳屠其家溥怒署璠宿州刺史俄殺之別遣將引銳兵三千入關僖宗因以武寧節度命之巢敗東走圍陳州營澉水秦宗權方據淮西相聯結溥地介於賊乃悉師討之軍鋒甚盛連戰

輒克授東面兵馬都統遂合許兗鄆兵逐尚讓於太康斬首數萬級讓以所部萬人降溥遣將李師悅等追尾巢至萊蕪大破之諸將爭得巢首而林言斬之持歸溥以獻天子故破賊溥功第一加檢校司徒同中書門下平章事進檢校太尉兼中書令鉅鹿郡王宗權阻兵拜溥蔡州行營兵馬都統賊平與朱全忠爭功嫌甚日構孫儒方與楊行密爭揚州詔全忠爲淮南節度使平其亂溥自以先起功名顯朝廷位都統顧不得而全忠得之頗悵恨全忠使司馬李璠郭言等東兵道宿州遣溥書請假道溥辭不可間其墮以兵襲之言戰甚力解而

還全忠怨自是連歲畧徐泗師不弛甲全忠自將及其
郊未得志引去溥窮乞師於李克用克用爲攻礪山朱
友裕救之各亡其大將友裕進攻宿州不能拔時大順
元年也明年丁會築堤闕汴水灌宿鄆三月拔之使劉
瓚守而溥將劉知俊引兵二千降全忠軍益不振民失
田作又大水荐飢死喪十七以上乃請和於全忠全忠
約徙地而罷兵昭宗以宰相劉崇望代之授溥太子太
師溥慮去徐且見殺惶惑不受命諭軍中固留有詔聽
可泗州刺史張諫聞溥已代卽上書請隸全忠納質子
焉溥旣復留諫大懼全忠爲表徙鄭州刺史諫畏兩怨
集已乃奔揚行密行密以諫爲楚州刺史并其民徙之
以兵屯泗朱友裕率軍攻溥嬰城不出有語全忠曰軍
行非吉日故師無功全忠遣參謀徐璠至軍責諭友裕
答曰溥困且破乃徇妖辭士心惶矣焚其書督餽饋急
攻之溥將徐汶出降溥求救於朱瑾全忠自以兵屯曹
將去留精騎數千授霍存曰事急可倍道趨之瑾兵二
萬與溥合攻友裕存引兵疾戰瑾溥還壁明日復戰霍
存敗死之進逼友裕友裕堅營不出瑾食盡還兗州全
忠使龐師古代友裕溥分兵固保石佛山師古攻拔之
自是完壘不戰王重師牛存節等梯其堞以入溥徙金

王與妻子登燕子樓自焚死實景福二年全忠遂有其地私置守焉

朱宣宋州下邑人父以豪猾聞里中坐鬻鹽抵死宣亡命去青州爲王敬武牙軍黃巢之亂敬武遣將曹存實率兵西入關而宣爲軍候道鄆州是時節度使薛崇拒王仙芝戰死其將崔君裕攝州事存實揣知兵寡襲殺之據其地遂稱留後以宣功多署濮州刺史留總帳下兵中和初魏博韓簡東窺曹鄆引兵濟河存實迎戰死于陣宣收殘卒嬰城簡圍之六月不能拔引兵去僖宗嘉其守拜宣天平節度使累加同中書門下平章事宣

有衆三萬弟瑾勇冠三軍陰有爭天下心瑾嗜殘殺光啓中求婚於兗州節度使齊克讓託親迎載兵竊發逐克讓據府自稱留後天子卽授以帥節兄弟雄張山東時秦宗權悉兵攻朱全忠使秦賢列三十六壁自將督戰全忠大恐求救于宣宣與瑾身率師往擊宗權宗權敗走全忠厚德宣兄事之情好篤密而內忌其雄且所據皆勁兵地欲造怨乃圖之卽聲言宣納汴亡命移書詆讓宣以新有恩於全忠故答檄恚望全忠由是顯結其隙使朱珍先攻瑾取曹州壁乘氏宣救曹不克奔還范珍圍濮州宣使弟罕救濮全忠自將擊罕斬之拔濮

州朱裕奔歸鄆使珍薄鄆挑戰宣不出裕爲書給降導
珍入信之夜以兵數千傅城裕開門軍入縣門發死者
數千縱礮石擊未入者殺裨將百餘人復取曹以郭詞
爲刺史大將郭銖斬詞奔全忠瑾謀悉兵襲汴全忠乃
自攻瑾瑾以兵掠單父與全忠將丁會轉戰不勝去景
福初復伐宣令從子友裕先驅自繼之次衛南宣以輕
兵夜掩友裕軍走之據其營全忠未知運糧以入乃覺
走瓠河與友裕相失距濮十五里舍明日友裕乃至宣
留濮州全忠令友裕馳壯騎謀鄆虛實身將而北會宣
引還縱兵戰全忠南走絕塹土幾不脫大將多死乃謀
持火微極取宣歲一再暴其鄙奪之食俘其工織勸有
存者宣令賀瓌守濮州爲友裕所攻委城走友裕進擊
徐州時溥求援於宣戰不勝而還溥遂亡全忠卽遣龐
師古攻齊州宣瑾皆戍以兵久不下乾寧元年全忠身
往薄清河結壘宣瑾三分其兵出擊之全忠迎戰東阿
南風急汴軍居下甚懼俄而風返全忠得縱火焚其旁
燔薰漲天宣等大北是夏全忠壁曹州南宣薄戰禽其
將二人全忠還明年使朱友恭擊兗州瑾堅壁乃塹而
守宣饒瑾友恭奪其糧全忠自軍單父會宣求救於李
克用友恭退壁曹南數月全忠自伐宣刈其麥敗克用

將李承嗣等乃還宣追之大鈔曹州其秋全忠復攻鄆
壁梁山宣克用挑戰全忠設伏破之斬首數千級引而
南克用躡全忠後至栢和大寒全忠軍多死不閱月復
圍兗州因略地龔丘賀瓌以奇兵擊全忠輜重不及戰
鉅野東瓌大敗見禽師無牙餘軍道大陂風暴起全忠
曰豈殺人有遺邪乃搜軍中復斬數千人風亦止執瓌
示城下瑾之兄瓊守齊州見勢屈以州歸全忠結同姓
懼全忠許之輕騎至軍全忠勞苦加禮因使招瑾瓊領
精騎鬲池笑語如平生歡乃使將胡規僞送款欲得瓊
躬上符節全忠不之虞瑾伏壯士橋下瓊單騎至方交

語士突起掖瓊以入斬其首棄城下汴軍大震全忠恚
數日乃去三年克用使其將李瑋以兵屯莘援宣爲羅
弘信所破全忠大喜度宣可因遣龐師古伐宣宣逆戰
敗于馬頰河師古迫其西門兵不出全忠之攻宣凡十
興師四敗績宣才將皆盡益內沮度不能與全忠确則
固守增堞深溝爲不可逼明年葛從周密造舟于塹師
人踰而升宣出奔爲民所縛追至執以獻全忠斬之而
納其妻使師古攻兗州二月食盡瑾自出督芻粟轉掠
豐沛間而子用貞及大將康懷英等舉城降瑾引麾下
走沂州刺史尹懷賓不納乃趨海州刺史朱用芝以其

唐書卷一百一十五 列傳 第六
衆與瑾奔楊行密行密迎之高郵解玉帶以賜表領徐州節度使畀以兵師古從周以兵七萬討行密瑾敗之清口擊殺師古而從周還師至泚水方涉瑾追及殺傷溺死幾盡瑾事行密尤盡力

孫儒河南河南人以趨下橫里中隸忠武軍爲裨校與劉建鋒善黃巢亂以兵屬秦宗權爲都將光啓初宗權遣儒攻東都留守李罕之出奔儒焚宮闕屠居人河陽節度使諸葛爽與儒戰洛水爽敗儒亦東圍鄭州朱全忠屯中牟救之不敵前儒衆夜登城刺史李璠走儒進拔河橋遂取河陽留後諸葛仲方出奔全忠壁河陰儒

掠汴鄙全忠兵郤屯胙城東南列僞旗鼓疑之儒乃還會全忠與宗權戰宗權敗走儒聞殺孟人流尸於河焚井邑乃去宗權又遣儒鈔淮南乘高駢之亂儒留濠州會楊行密得揚州宗權使弟宗衡爭淮南以儒爲副建鋒爲前鋒儒常曰丈夫不能苦戰萬里賞罰繇已奈何居人下生不能富貴死得廟食乎未幾汴兵攻蔡宗權召之儒稱疾不往宗衡督之卽大會帳下酒酣斬宗衡并其衆與建鋒許德勳等盟有騎七千因略定傍州不淹旬兵數萬號土團白條軍文德元年破揚州自爲淮南節度使與時溥連和初全忠嘗以書招儒故又納款

於汴且送宗衡秦彥畢師鐸首全忠藉以聞昭宗授儒
檢校司空全忠署爲招討副使龍紀初悉兵攻宣州行
密取淮南儒還行密走始得潤常蘇三州兵益彊使建
鋒守潤常全忠約行密圖之儒謀定江南乃北爭天下
畏全忠擣虛乃遣人卑辭厚賄全忠薦於朝詔授淮南
節度使大順元年行密取潤州以安仁義守之常州以
李友守之儒怒三分其軍度江建鋒復拔常潤仁義走
全忠遣將龐從等軍十萬奄至高郵儒悉師禦之故仁
義間取潤州劉威田頔等敗建鋒於武進取常州杭州
錢鏐將沈粲自蘇州奔儒行密諸將在潤常者皆爲建
鋒所逐仁義頔棄潤州走明年儒引兵自京口轉戰召
建鋒皆行行密諸將屯險者聞儒至皆走頔威等合兵
二萬邀儒黃池儒遣馬殷擊走之儒營廣德乘勝至東
溪淮人大恐行密遣臺濠屯西溪自引軍逆戰儒軍圍
之數重黑雲將李簡以騎馳之行密乃免儒遂圍宣州
行密乞師於錢鏐會谿潦暴湧廣德黃池諸壁皆沒儒
分兵取和滁二州其秋儒焚揚州引而西傳檄遠近號
五十萬旌旗相屬數百里所過燒廬舍殺老弱以給軍
行密懼將遁去戴規曰儒軍數敗今掃地而至決死於
我若吾遣降者間至揚州撫尉衣食使儒軍聞其家尚

完人人思歸不戰可禽也行密乃遣親將入揚州取儒營糧數十萬斛以稟飢民儒屯廣德陶雅以騎軍破儒前鋒屯嚴公臺十二月顏威與儒決戰皆大敗儒連屯稍西行密使陶雅屯潤州扼其歸路景福元年儒復圍宣州屯陵陽行密戰不利謀出奔時劉威方繫獄且死行密窮更召問計對曰儒焚倉隕壘以來糧盡將爲我禽若勁兵背城坐制其困李神福亦請據險邀儒糧行密乃分兵攻廣德壁而絕饗道軍適大疫儒病疢遣建鋒殷鈔諸縣行密知城下兵寡乃晨出率仁義顏背城決戰破五十壁會暴澍且冥儒軍大敗儒病甚股弁不能興顏執儒獻行密諸將皆降儒就刑于市見劉威曰中君之謀儒嘗引鑑搔首曰此頭不久當入京師至是傳首闕下建鋒殷哭之相語曰公常有志廟食吾等有土當廟以報德及殷據湖南表儒贈司徒樂安郡王立廟以祀

唐書卷一百八十八終

唐書卷一百八十九 高趙田朱列傳第一百一十四

宋宋祁撰

皇明朝列大夫國子監祭酒臣蕭良有

承直郎 司業臣葉向高等奉

勅重校刊

高仁厚亡其系出初事劔南西川節度使陳敬瑄為營使黃巢陷京師天子出居成都敬瑄遣黃頁軍部將李鋌鞏咸以兵萬五千戍興平數敗巢軍賊號蜀兵為鴟兒每戰輒戒曰毋與鴟兒鬪敬瑄喜其兵可用益選卒二千使仁厚將而東先是京師有不肖子皆箸疊帶冒

持挺剽閭里號閑子京兆尹始視事輒以者以怖其餘竇滴治京兆至殺數十百人稍稍憚戢巢入京師人多避難寶雞閑子掠之吏不能制仁厚素知狀下約入邑閭縱擊軍入閑子聚觀唾侮於是殺數十人坊門反閉欲亡不得故皆死自是閭里乃安會邛州賊阡能衆數萬略諸縣列壁數十涪州刺史韓秀昇等亂峽中韓求反蜀州諸將不能定敬瑄召仁厚還使督兵四討屯永安阡能遣謀者入軍中吏執以獻謀自言父母妻子囚於賊約不得軍虛寔且死仁厚哀之曰爲我報賊明日我且戰有能釋甲迎我者署背曰歸順皆得復農矣

縱謀去命諸將毀柵鼓而前賊渠羅渾擎設伏詐降仁厚遣將不持兵入諭其衆皆真降渾擎詐窮而逸吏執之仁厚曰愚人不足語降衆署背得免則告諸壁大軍至賊帥句胡僧大驚斬之莫能禁衆執胡僧以降韓求和大賊已禽徇諸壁曰敢出者斬衆罵之求赴水死衆鈎出斬以徇餘柵皆下仁厚按轡裴回視賊壘吏請焚之仁厚命取財糧乃縱火尸賊成都仁厚還天子御樓勞軍授仁厚檢校尚書左僕射眉州刺史光啟二年遂據梓州絕敬瑄君雄時爲遂州刺史亦陷漢州攻成都敬瑄使部將李順之逆戰君雄死又發維茂州羗軍擊

仁厚斬之乾寧中皆追贈司徒

趙犨陳州宛丘人世爲忠武軍牙將犨資警健兒弄時好爲營陣行列自號令指顧群兒無敢亂父叔文見之曰是當大吾門稍長喜書學擊劔善射會昌中從伐潞州牧天井關又從征蠻忠武軍功多遷累檢校司空加泰寧浙西兩節度龍紀初進同中書門下平章事忠武軍節度仍治陳州流亡踵還與弟昶至友愛後將老悉以軍事付之乃卒贈太尉

昶字大柬神采軒異而沈厚有法度破孟楷功多犨領泰寧以昶爲州刺史檢校尚書右僕射當時方鎮言

忠壯吏治舉言犨昶犨之老乃授留後遷忠武節度使進檢校司徒劭勸農桑於人有恩惠加同中書門下平章事乾寧二年卒年五十三贈太尉犨子珣

珣字有節雄毅喜書善騎射巢之難激勵麾下約皆死以先冢邇賊畏見殘齧即夜縋死士取柩以入庫有巨弩機牙壞不能張珣以意調治激矢至五百步人馬皆洞賊畏不敢逼以勞檢校尚書右僕射遇領處州刺史三加檢校大保光化二年同中書門下平章事進兼侍中封天水郡公昭宗還長安詔入朝賜號迎鑿功臣以檢校太傅爲右金吾衛上將軍從東遷歲餘以疾免卒

年五十五贈侍中陳人爲罷市

田頌字德臣廬州合肥人略通書傳沈果有大志與楊行密同里約爲兄弟應州募屯邊遷主將行密據廬州頌謀爲多攻趙鏗於宣州鏗出東溪乘暴流以逸阻水解甲謂追騎不能及頌乘輕舸追之鏗驚遂見禽行密表爲馬步軍都虞候沙陀叛將安仁義奔淮南行密大喜屬以騎兵使在頌右兩人名冠軍中時有朱瑾槊米志誠弩皆稱第一仁義常曰志誠弩十不當瑾槊之一瑾槊十不當吾弓之一人以爲然又其治軍嚴善得士心戰卒數百濠梁不毀開門鬪先告所當中然從射之

茂章等不敢與確行密遣使謂曰吾不忘公功能自歸當復爲行軍副使但不可處兵仁義欲降其子固諫乃止行密召其將臺濛泣語曰人嘗告頌必反我不忍負人頌果負我吾思爲將者非公莫可濛頓首謝率騎度江爲陣以行士笑其法濛曰頌宿將多謀備之何害與王壇等戰廣德濛以行密書遺壇諸將皆再拜氣奪濛麾兵擊之壇走神福旣以不戰困頌頌紿言母病還至蕪湖聞壇敗留精兵二萬屬郭行琮身走城濛之行爲狹營小舍覘者以爲才容二千人頌輕之不復召兵與戰黃池矢石始交而濛遁兵爭逐北遇伏頌大敗召蕪

唐書卷一百九十九 列傳 四
湖兵不得入行琮及壇皆歸行密願志自料死士數百
號爪牙都身薄戰濛退軍示弱士超隍濛殊死戰軍潰
願奔城橋陷爲亂兵所殺年四十六其下猶闔示願首
乃潰願始以元瓘歸戰不勝輒欲殺之願母護免及鏐
與行密合願曰今日不勝必殺元瓘已而願死傳首至
淮南行密泣下葬以庶人禮

朱延壽姊楊行密妻也掖之行密泣曰吾喪明諸子幼
得舅代我無憂矣遣辯士召之延壽疑不肯赴姊遣婢
報故延壽疾走揚州拜未訖士擒殺之而廢其妻

贊曰全忠唐之盜也行密志梟其元而後已田頔使出
軍賦而助之此其謀責難而絕之非忠於忠也棄所附
而覬尊大亦已妄矣孔子稱孟公綽爲趙魏老則優不
可以爲滕薛大夫如仁厚田朱材不足爲吳蜀之老可
與事天子哉

唐書卷一百八十九終

唐書卷一百九十

三劉成杜鍾張王列傳第二百五十五

宋宋祁撰

皇明朝列大夫國子監祭酒臣蕭良有

承直郎 司業臣葉向高等奉

勅重校刊

劉建鋒字銳端蔡州朗山人為忠武軍部將與孫儒馬
殷同事秦宗權儒之敗建鋒殷敗散卒轉寇江西有眾
七千推建鋒為主殷為前鋒張佶為謀至略洪虔數州
眾遂十餘萬乾寧元年取潭州殺武安節度使鄧處訥
自稱節度留後奉表京師詔即拜檢校尚書左僕射武

唐書卷一百九十一 列傳
安軍節度使建鋒已得志即嗜酒不事事新息小史陳
贍爲建鋒御者妻美且豔乃私之贍怒袖鐵槌擊建鋒
斷其喉而死衆推張佶爲帥佶固辭馬蹠傷佶左髀下
令曰吾非勳主時馬殷攻邵州未克於是遣人迎殷磔
贍于市殷至佶坐受其謁旣而率將吏推殷爲留後詔
即除檢校太傅潭州刺史

成汭青州人少無行使酒殺人亡爲浮屠後入蔡賊中
爲賊帥假子更姓名爲郭禹當戍江陵亡爲盜保火門
山後詣荆南節度使陳儒降署裨校久之張瓌囚儒以
禹凶慄欲殺之禹結千人奔入峽自稱刺史招還流亡

訓士伍得勝兵三千秦宗權故將許存奔禹禹以青州
剽卒三百畀之使討荆南部將牟權于清江禽權取其
衆禹又被其將王建肇建肇奔黔州昭宗拜禹荆南節
度留後始改名汭復故姓天復三年帝詔淮南節度使
楊行密圍鄂州朱全忠使韓勅救之諷汭與馬殷雷彥
威掎角汭身自將而行下知汭不足亢行密無敢諫唯
親吏楊師厚勸之汭爲巨艦堂皇悉備行至公安卜不
吉欲還師厚曰公舉全軍中道還何以見百姓汭乃行
彥威潛師略江陵汭諸將念私無鬪志淮南將李神福
擊汭君山敗之火其船衆大潰汭投江死士民皆爲彥

唐書卷一百九十一 列傳二十一
威所劫韓勅走還天祐中全忠表泐死國事請與杜洪
皆立廟云

杜洪鄂州人爲里俳兒乾符末黃巢亂江南永興民皆
亡爲盜刺史崔紹募民彊雄者爲土團軍賊不敢侵於
是人人知兵杭州刺史路審中爲董昌所拒走客黃州
中和末聞紹卒募士三千入鄂州以守洪爲州將有功
亦逐岳州刺史居之光啟二年安陸賊周通率兵攻審
中審中亡去洪乘虛入鄂自爲節度留後僖宗即拜本
軍節度使

鍾傳洪州高安人以負販自業或勸其爲盜必大顯時
王仙芝猖狂江南大亂衆推傳爲長乃鳩夷獠依山爲
壁至萬人自稱高安鎮撫使仙芝遣柳彥璋掠撫州不
能守傳入據之言諸朝詔即拜刺史中和二年逐江西
觀察使僖宗擢傳江西團練使俄拜鎮南節度使檢校
太保中書令爵潁川郡王傳少射獵醉遇虎與鬪虎搏
其肩而傳亦持虎不置會人斬虎然後免既悔之戒
諸子曰士處世尚智與謀勿效吾暴虎也乃畫搏虎狀
以示子孫天祐三年卒子匡時自立爲節度觀察留後
次子匡範爲江州刺史

劉漢宏本兗州小史從大將擊王僊芝劫輜重叛去乾

符末略江陵焚民室廬廬無完家於是都統王鐸遣將
崔錯降之表爲宿州刺史漢宏恨賞簿有望言會浙東
觀察使柳瑫得罪乃授漢宏觀察使代之僖宗在蜀貢
輸踵驛而西帝悅寵其軍爲義勝軍即授節度使漢宏
既有七州志侈大輒曰天下方亂金刀非吾尚誰哉
遂悉軍十萬列艦西陵謀宵濟襲董昌禱於江有一矢墜
前惡之俄與鏐遇鏐俘馘五千漢宏羸服率麾下六百
人走台州鏐斬其母妻子屯杜雄饗其軍皆醉執漢宏
以見董昌漢宏曰自古豈有不亡國耶昌使斬於市叱
刑者曰吾節度使非庸人可殺我嘗夢持金殺我者必
錢鏐也昌命鏐斬之

張雄泗州漣水人馮弘鐸里人皆爲武寧軍偏將弘鐸
爲吏辱雄爲辯數并見疑於節度使時溥二人懼禍乃
合兵三百度江壁白下取蘓州據之稍稍嘯會戰艦千
餘兵五萬乃自號天成軍鎮海節度使周寶之敗奔常
州聞高駢將徐約兵銳甚誘之使擊雄與之蘓州雄匿
衆海中使別將趙暉據上元資以舟楫寶兵散多降暉
衆數萬雄即以上元爲西州負其才欲治臺城爲府旌
旗衣服僭王者大順初以上元爲昇州詔授雄刺史未
幾卒雄善馭衆人思之爲立廟弘鐸代爲刺史

王潮字信臣光州固始人五代祖曄為固始令民愛其仁留之因家焉世以顯僖宗入蜀盜興江淮壽春亡命王緒劉行全合羣盜據壽州未幾眾萬餘自稱將軍復取州劫豪桀置軍中潮自縣史署軍正主稟庾士推其信緒二州籍附秦宗權它日賦不如期宗權切責緒懼與行全拔眾南走略潯陽水取自稱刺史入漳州皆不能有也初以糧少故兼道馳約軍中曰以老孺從者斬潮與弟審邽審知奉母以行緒切責潮曰吾聞軍行有法無不法之軍對曰人皆有母不聞有無母之人緒怒欲斬其母三子同辭曰事母猶事將軍也殺其母焉用其子緒赦之會母死不敢哭夜殯道左而行全縛緒以徇眾推審知皆拜將軍審知讓潮自為副潮治軍有法故州人奉牛酒迎潮乃圍城歲餘克之殺彥若遂有其地昭宗假潮福建等州團練使俄遷觀察使乃作四門義學還流亡定賦歛遣吏勸農人皆安之乾寧中寵福州為威武軍即拜潮節度使檢校尚書左贈僕射卒贈司空

審邽字次都為泉州刺史檢校司徒喜儒術通書春秋善吏治流民還者假牛犂與完廬舍中原亂公卿多來依之如楊承休鄭璘韓偓鄭戩等賴以免禍審邽遣子

延彬作招賢院以禮之

劉知謙壽州上蔡人避亂客封州爲清海牙將節度使黃巢自嶺表北還湖湘間羣盜螳結知謙因據封州有詔即授刺史兼賀水鎮使以過梧桂知謙撫納流亡愛嗇用度養士卒未幾得精兵萬人多具戰艦境內肅然久之疾病卒共推其子隱爲嗣清海軍節度使昭宗拜隱本軍行軍司馬俄遷副使天復初節度徐彥若死隱自稱留後

盧光稠虔人有衆數萬據州自爲留後又取韶州劉隱與爭之戰不勝悉師攻虔州光稠伏軍掉戰隱縱驅伏發挺身免天祐初始詔隱權節度留後乃遣使者入朝重賂朱全忠以自固是歲光稠死子延昌自稱刺史爲其下所殺更推李圖領州事圖死鍾傳盡劫其衆欲進匡時守之不克州人遂爲之立譚全播爲刺史附云

唐書卷一百九十終

唐書卷一百九十一 忠義列傳上第一百一十六

宋宋祁撰

皇明朝列大夫國子監祭酒臣蕭良有

承直郎 司業臣葉向高等奉

勅重校刊

夫有生所甚重者身也得輕用者忠與義也後身先義
仁也身可殺名不可死志也大凡捐身以趣義者寧豫
期垂名不朽而為之雖一世成敗亦未必濟也要為重
所與終始一操雖顏高岱不吾壓也夷齊排周存商商
不害亡而周以興兩人至餓死不肯屈卒之武王蒙慙

德而夷齊爲得仁仲尼變色言之不敢少損焉故忠義者真天下之大閑歟姦鈇逆鼎搏人而肆其毒然殺一義士則四方解情故亂臣賊子赧然疑沮而不得逞何哉所以爲彼者而爲我也義在與在義亡與亡故王者常推而褒之所以砥礪生民而窒不軌也雖然非烈丈夫曷克爲之彼委靡軟熟偷生自私者真畏人也哉故次叙夏侯端等於左

夏侯端壽州壽春人梁尚書左僕射詳孫也仕隋爲大理司直高祖微時與相反大業中討賊河東表端爲副端邃數術密語高祖曰玉牀搖帝坐不安晉得歲真人

將興安天下之亂者其在公平但上性沈忌內惡諸李今金才已誅次且取公宜早爲計帝感其言義師興端在河東吏捕送長安帝入京師釋囚引入臥內擢祕書監李密之降關東地未有所屬端請假節招諭乃拜大將軍爲河南道招慰使卽傳檄州縣東薄海南捷淮二十餘州遣使順附次譙州會亳汴二州刺史已降王世充道塞無所歸計窮彷徨麾下二千人糧盡不忍委端去端乃殺馬宴大澤中謂衆曰我奉王命義無屈公等有妻子徒死無益吾若首持與賊以取富貴衆號泣不忍視端亦泣欲自刎爭持之乃止行五日餓死十四

三遇賊衆潰從者纔三十餘人遂東走擷豈豆以食端持節臥起歎曰平生不知死地乃在此縱其下令去毋俱沒會李公逸守杞州勒兵迎端時河南地悉入世充公逸感端之節亦固守世充遣人以淮南郡公尚書少吏部印綬召端解所服衣以贈端曰吾天子使寧汗賊官耶非持首去不可見卽焚書及衣因解節毛懷之間道走宜陽歷崖峭榛莽比到其下僅有在者皆體髮癯焦人不堪視端入謁自謝無功不及危困狀帝憫之復拜秘書監出爲梓州刺史散祿稟周孤窮不爲子孫計貞觀元年卒

劉感岐州鳳泉人後魏司徒豐生孫也武德初以驃騎將軍戍涇州爲薛仁果所圍糧盡殺所乘馬啖士而煮骨自飲至和木屑以食城垂陷長平王叔良救之賊乃解與叔良出戰爲賊執還圍涇州令感約城中降感給諾至城下大呼曰賊大飢亡在朝暮秦王數十萬衆且至勉之無苦仁果怒執感埋其半土中馳射之至死詔益甚賊平高祖購得其尸祭以少牢贈瀛州刺史爵平原郡公封戶二千諡忠壯詔其子嗣封爵賜田宅焉常達陝州陝人仕隋爲鷹擊郎將嘗從高祖征伐與宋老生戰霍邑軍敗自匿帝意已死久乃自歸帝大悅命

爲統軍拜隴州刺史時薛舉方強達敗其子仁杲斬首千級舉遣將件士政給降達不疑厚加撫接士政伺隙劫之并其衆二千歸賊舉指其妻謂達曰識皇后乎答曰彼癯老嫗何所道舉奴張貴又曰亦識我否達瞋目曰若乃奴耳貴忿舉笏擊其面達不爲懼亦拔刀逐之趙弘安爲蔽捍乃免仁杲平帝見達勞曰君忠節正可求之古人爲執士政殺之賜達布帛三百段以達并劉感事授史官令狐德棻云終隴西刺史

敬君弘絳州絳人北齊尚書右僕射顯雋曾孫也累功歷驃騎將軍封黔昌侯以屯營兵守玄武門隱太子之

死左右解散其車騎將軍馮立者有材武歎曰生賴其寵死不共難我無以見士大夫乃與巢王親將謝叔方率兵攻玄武門殊死鬪君弘挺身出或曰事未可判當按兵待變成列而鬪可也不從與中郎將呂世衡呼而進皆戰歿立顧其下曰足以報太子矣遂解兵走君弘等敗秦府兵不振尉遲敬德擲巢王首示叔方叔方下馬勸亦出奔明日自歸太宗曰義士也置之俄而立又至帝讓曰汝離我兄弟罪一也殺我將士罪二也何所逃死答曰出身事主當戰之日不知其它因伏地悲不自勝帝亦勞遣之詔贈君弘左屯衛大將軍世衡右驍

衛將軍立已蒙貸歸語人曰上赦吾罪吾當以死報未
幾突厥犯便橋立引數百騎與虜薄敗之咸陽帝喜授
廣州都督前日牧守苛肆爲蠻夷患故數叛立至不事
家產衣食弗求羸嘗見貪泉曰此豈隱之所酌邪吾雖
日汲庸易吾性哉遂劇飲去在職不三年有惠愛卒于
官

叔方歷伊州刺史善治軍戎華愛之累加銀青光祿大
夫徙洪廣二州都督卒諡曰勤本萬年人從巢王征討
有功王表爲屈咥真府左軍騎云

呂子臧蒲州河東人剛直健于吏隋大業末爲南陽郡

丞捕擊盜賊有功高祖入京師遣馬元規慰輯山南獨
子臧堅守元規遣士諷曉子臧殺之及煬帝已弑帝更
使其婿薛君倩齎詔言隋所以亡諭子臧子臧爲故君
發喪訖卽送款就拜鄧州刺史封南陽郡公武德初朱
粲新劔子臧率兵與元規并力元規兵不進子臧曰乘
賊新敗上下惶沮一戰可禽若遷延其衆稍集吾食盡
致死於我不可當也不納子臧請以所部兵獨進又不
許俄而粲得衆復張元規嬰城子臧扼腕曰謀不見用
坐公死矣賊圍固會霖雨雉堞崩剝或勸其降子臧曰
我天子方伯且降賊乎乃率麾下數百人赴敵死城亦

唐書卷一百九十一 列傳 五
陷元規死之元規安陸人初以隊正從帝征伐持節下南陽得兵萬餘然無謀以至於敗

王行敏并州樂平人隋末爲盜長高祖興來降拜潞州刺史遷屯衛將軍劉武周入并州寇上黨取長子壺關或言刺史郭子武懦不支且失潞帝遣行敏馳往旣至與子武不叶賊圍急儲侍空乏衆恟懼行敏患之會有告子武謀反遂斬之州民陳正謙者以信義稱鄉里出粟千石濟軍由是人自奮賊乃去行敏又敗竇建德兵於武陟武德四年督兵徇燕趙與劉黑闥戰歷亭破之旣而釋甲不設備爲黑闥所掩縛致麾下終不屈賊遂

斬之且死西向跪曰臣之忠惟陛下知之帝聞而悼惜黑闥之亂死事者又有盧士叡李玄通士叡客韓城隋亂結納英豪高祖與之舊及兵興率數百人上謁汾陰又使兄子諭降劇賊孫華與劉弘基敗隋將桑顯和於飲馬泉擢累右光祿大夫爲瀛州刺史黑闥遣輕騎破其郭拒戰半日士見親屬係虜乃潰士叡爲賊禽欲使說下城堡不從見殺玄通藍田人爲隋鷹揚郎將高祖入關率所部自歸拜定州總管爲黑闥所破愛其才欲以爲將玄通曰吾當守節以報烏能降志賊邪不聽囚之故吏有餉欲餽者玄通曰諸君見哀吾能一醉遂縱

飲謂守者曰吾能劔舞可借刀守士與之曲終仰天大
息曰大丈夫撫方面不能保所守尚何視息邪乃潰腹
死帝爲流涕擢其子伏護大將軍。

羅士信齊州歷城人隋大業時長白山賊王薄左才相
孟讓攻齊郡通守張須陁率兵擊賊士信以執衣年十
四短而悍請自効須陁疑其不勝甲少之士信怒被重
甲左右韃上馬顧眄須陁許之擊賊濰水上陣纔列執
長矛馳入賊營刺殺數人取一級擲之承以矛戴而行
賊皆貽懼無敢亢須陁乘之大破賊士信逐北每殺一
賊輒割鼻納諸懷暨還驗以代級須陁歎伏遺以所乘

馬凡戰須陁先登士信副以爲常煬帝遣使圖須陁士
信陣法上內史後須陁爲李密所殺士信與裴仁基歸
密署總管俾統所部討王世充身被重創見獲於世充
世充愛其才厚遇之與同寢食後得密將邴元真等故
士信稍稍疏斥士信恥與伍率所部千餘人來降高祖
拜陝州道行軍總管因謀世充士信行則先鋒反則殿
有所獲悉散戲下有功者或脫衣解馬賜之士以故用
命然持法嚴至親舊無少貸其下亦不甚附師次洛陽
攻千金堡堡有惡言詢軍士信怒夜遣百人載嬰兒唬
譟堡下若自東都出奔者旣而陽悟曰非也此千金堡

耳因散去堡兵開門追掠士信伏入屠之無類賊平授絳州總管封郟國公從秦王擊劉黑闥洛水上得一城王君廓成之賊急攻潰而出王語諸將孰能守此士信曰願以守乃命之士信已入賊悉衆攻方雨雪救軍不得進城陷黑闥欲用之不屈而死年二十八王隱悼購其尸以葬諡曰勇初士信爲仁基所禮及東都平出家財斂葬北邙以報德且曰我死當墓其側至是如所志張道源并州祁人名河以字顯年十四居父喪士人賢其孝縣令郭湛署所居曰復禮鄉至孝里道源嘗與客夜宿客暴死道源恐主人忽怖臥尸側至曙乃告又徒

步護送還其家隋末政亂辭監察御史歸閭里高祖與署大將軍府戶曹參軍至賈胡堡復使守并州京師平遣撫慰山東下燕趙有詔褒美封累范陽郡公淮安王神通略定山東令守趙州爲竇建德所執會建德寇河南間遣人詣朝請乘虛擣賊心脅卽詔諸將率兵影接俄而賊平還拜大理卿時何稠得罪籍其家屬賜羣臣道源曰禍福何常安可利人之亡取其子女自奉仁者不爲也更資以衣食遣之天子見其年耆拜綿州刺史卒贈工部尚書諡曰節道源雖官九卿無貲產比亡餘粟二斛詔賜帛三百段族孫楚金有至行與兄越石皆

舉進士。州欲獨薦，楚金固辭，請俱罷。都督李勣歎曰：「士求才行者也，既能讓，何嫌皆取乎？」乃並薦之。累進刑部侍郎。儀鳳初，彗見東井，上疏陳得失。高宗欽納，賜物二百段。武后時，歷秋官尚書、爵南陽侯。有清槩，然尚文刻。當時亦少之，爲酷吏所構，流死嶺表。

李育德，趙州人。祖諤，仕隋，通州刺史，爲名臣。世富于財，家僮百人。天下亂，乃私完械甲，嬰武陟城，自保。人多從之，遂爲長劇。賊來掠，不能克。隋亡，與柳燮等歸李密。私署總管，密爲王世充所破，以郡來降。卽拜陟州刺史。兄厚德自賊所逃歸，度河復被執，賊使招育德、陽許之。故

兄不死。賊帥段大師令裨校以兵守厚德。陰得其驪，乃與州人賈慈行謀逐賊。慈行夜登城，呼曰：「唐兵登矣！」厚德自獄擁羣囚，譟而出，斬長吏。衆不敢動。大師縋城走，卽拜殷州刺史。厚德省親，留育德以守，引兵拔賊河內。堡三十一所，世充怒，悉銳士攻之。城陷，猶力戰。與三弟皆歿。時死節者又有李公逸、張善相。凡三人。公逸者，與族弟善行居雍丘，以才雄爲衆所歸。始附王世充，策其必敗，乃獻款。高祖因其地置杞州，卽拜總管，封陽夏郡公。以善行爲刺史。世充遣其弟將徐毫兵攻之。公逸請援，未報。因使善行守身入朝，言狀。至襄城，爲賊邏送洛

陽世充曰君越鄭臣唐何哉答曰我於天下唯聞有唐賊怒斬之善行亦死帝悼惜封其子襄邑縣公善相襄城人大業末爲里長督兵迹盜爲衆附賴乃據許州奉李密密敗挈州以來詔卽授伊州總管王世充攻之屢困賊遣使三輩請救朝廷未暇也會糧盡衆餓死善相謂僚屬曰吾爲唐臣當効命君等無庸死斬吾首以下賊可也衆泣不肯曰與公同死愈於獨生城陷被執罵賊見殺高祖歎曰吾負善相善相不負我乃封其子襄城郡公

高叡京兆萬年人隋尚書左僕射頰孫也舉明經稍遷

通義令有治勞人刻石載德歷趙州刺史平昌縣子聖曆初突厥默啜入寇叡嬰城拒虜攻益急長史唐波若度且陷卽與虜通叡覺之力不能制卽自經不得死爲虜執使降諭諸縣不肯應見殺初虜至有爲叡計者突厥逢銳所向無完公不能亢且當下之答曰我刺史不戰而降罪大矣武后歎息贈冬官尚書諡曰節詔誅波若籍其家下制暴叡忠節波若臣賊使天下知之子仲舒通故訓學擢明經爲相王府文學王所欽器開元初宋璟蘇頲當秉多咨訪焉時舍人崔琳練達政宜璟等禮異之常語人曰古事問高仲舒時事問崔琳何復疑

終太子右庶子

安金藏京兆長安人在太常工籍睿宗爲皇嗣少府監
裴匪躬中官范雲仙坐私謁皇嗣皆殊死自是公卿不
復見唯工優給使得進俄有誣皇嗣異謀者武后詔來
俊臣問狀左右畏慘楚欲引服金藏大呼曰公不信我
言請剖心以明皇嗣不反也引佩刀自刺腹中腸出被
地眩而仆武后聞大驚輿致禁中命高醫內腸褫桑社
紕之閱夕而蘇后臨視歎曰吾有子不能自明不如爾
之忠也卽詔停獄睿宗乃安當是時朝廷士大夫翕然
稱其誼自以爲弗及也神龍初母喪葬南闕口營石墳
晝夜弗息地本印燥泉忽湧流廬之側李冬有華犬鹿
相擾本道使盧潛諱其事詔表闕于閭景雲時遷右
武衛中郎將玄宗屬其事於史官擢右驍衛將軍爵代
國公詔鑿其名於秦華二山碑以爲榮卒配饗睿宗廟
廷大曆中贈兵部尚書諡曰忠以子承恩爲廬州長史
中和中擢其遠孫敬則爲太子右諭德

王同皎相州安陽人陳駙馬都尉寬曾孫也陳亡徙河
北長安中尚太子女安定郡主拜典膳郎太子中宗也
桓彥範等誅二張遣同皎與李湛李多祚卽東宮迎太
子請至玄武門指授諸將太子拒不許同皎進曰逆豎

反道顯肆不軌諸將與南衙執事刻期誅之須殿下到以係衆望太子曰上方不豫得無不可乎同皎曰將相毀家族以安社稷奈何欲肉之鼎鑊乎太子能自出諭之衆乃止太子猶豫同皎即扶上馬從至玄武門斬關入兵趨長生殿太后所環侍嚴定因奏誅易之等狀帝復位擢右千牛將軍封琅邪公食實戶五百主進封公主拜同皎駙馬都尉遷光祿卿神龍後武三思丞濁王室同皎惡之與張仲之祖延慶周憬李悅冉祖雍謀須武后靈駕發伏弩射殺三思命官播州司兵參軍宋之慈以外妹妻延慶延慶辭之慈固請乃成昏延慶心厚之不復疑故之慈子曇得其實少之慈兄之間嘗舍仲之家亦得其謀令曇密語三思三思遣悅上急變且言同皎欲擁兵闕下廢皇后帝殊不曉大怒斬同皎於都亭驛籍其家同皎且死神色自如仲之延慶皆死憬遁入比干廟自剄將死謂人曰比干古忠臣神而聰明其知我乎后三思亂朝虐害忠良滅亡不久可干吾頭國門見其敗也憬壽春人後太子重俊誅三思天下共傷同皎之不及見也睿宗立詔復官爵諡曰忠壯誅祖雍悅等先是許州司戶參軍燕欽融再上書斥韋后擅政且逆節已萌后怒勸中宗召至廷撲殺之宗楚客復私令衛

萬曆二十三年刊

士極力故死又博陵人郎岌亦表后及楚客亂被誅至是俱贈諫議大夫備禮改葬賜欽融一子宮同皎子繇尚末穆公主生子潛字弘志生三日賜緋衣銀魚幼莊重不喜兒弄以帝外孫補千牛復選尚公主固辭元和中擢累將作監吏或籍名北軍輒驕墮不事潛悉奏罷之故不戒而辦監無公食而息錢舊皆私有至潛取以具食遂爲故事遷左散騎常侍拜涇原節度使憲宗與對大悅曰吾知而善職我自用之潛至鎮繕壁壘積粟構高屋倚兵利而嚴遂引師自原州踰硤石取虜將一人斥烽候築歸化潘原二壘請復城原州度支沮議故

原州復陷穆宗卽位封琅琊郡公更節度荆南疏吏惡榜之里閭殺尤縱者分射三等謀士習之不能者罷故無冗軍太和初檢校尚書左僕射卒于官贈司空

吳保安字永固魏州人氣挺特不俗睿宗時姚雋蠻叛拜李蒙爲姚州都督宰相郭元振以弟之子仲翔託蒙蒙表爲判官時保安罷義安尉未得調以仲翔里人也

不介而見曰願因子得事李將軍可乎仲翔雖無雅故哀其窮力薦之蒙表掌書記保安後往蒙已深入與蠻戰沒仲翔被執蠻之俘華人必厚責財乃肯贖聞仲翔貴胄也求千緡會元振物故保安留雋州營贖仲翔苦

無資乃方居貨十年得縑七百妻子客遂州聞關求保
安所在困姚州不能進都督楊安居知狀異其故資以
行求保安得之引與語曰子棄家急朋友之患至是乎
吾請貸爲貲助子之乏保安大喜卽委縑于蠻得仲翔
以歸始仲翔爲蠻所奴三逃三獲乃轉鬻遠酋酋嚴遇
之晝役夜囚役凡十五年乃還安居亦丞相故吏嘉保
安之誼厚禮仲翔遺衣服儲用檄領近縣尉义乃調蔚
州錄事參軍以優遷代州戶曹母喪服除喟曰吾賴吳
公生吾死今親歿可行其志乃求保安于時保安以彭
山丞客死其妻亦沒喪不克歸仲翔爲服縗經囊其骨
徒跣負之歸葬魏州廬墓三年乃去後爲嵐州長史迎
保安子爲娶而讓以官。

李愷并州汶水人或言其先出與聖皇帝譜系疏晦不
復傳父希倩神龍初右臺監察御史愷少秀敏舉明經
高第授成安尉張說罷宰相爲相州刺史坐有善相者
說徧問官屬後孰當貴工指愷及臨河尉鄭巖說以女
妻巖而歸其甥陰於愷會母喪免自武功尉以政尤異
遷主簿說在并州引愷置幕府及執政爲長安尉宇文
融括天下田高選官屬多致賢以重其柄表假愷監察
御史分道檢覈以課真拜御史坐小累下除晉陽令三

遷給事中力于治有任事稱明簿最下無敢給失李林甫意出為河南少尹尹蕭炎內倚權翫法植私愷裁抑其謬吏下賴之道士孫翫生以左道幸託祠事往來嵩少間于請亂吏治愷不為應故挾灵譖諸朝天寶初除清河太守舉美政遷廣陵長史民為立祠賽祝歲時不絕以捕賊負徙彭城大守封酒泉縣侯連徙襄陽河東並兼採訪處置使入為京兆尹楊國忠惡之改光祿卿東京留守安祿山反玄宗遣封常清募兵東京愷與劉臺御史中丞盧弈河南尹達奚珣繕城壘綏勵士卒將遇賊西鋒帝聞擢禮部尚書祿山在河號令嚴密候訶

不能知已陷陳留榮陽殺張介然崔無詖不數日薄城下常清兵皆白徒戰不勝輒北愷收殘士數百哀斷弦折矢堅守人不堪鬪愷約奔吾曹荷國重寄雖力不敵當死官部校皆夜縋去愷坐留守府奔守臺城陷祿山鼓而入殺數千人矢著闕門執愷弈及官屬蔣清害之有詔贈司徒諡曰忠懿河洛平再贈太尉拜一子五品官愷通左氏春秋頗殖產伊川占膏腴自都至關口疇墅囑望時謂地癖巖仕終少府監產利埒愷云愷十餘子江涵風瀛等同遇害唯源彭脫

源八歲家覆俘為奴轉側民間及史朝義賤故吏識源

於洛陽者贖出之歸其宗屬代宗聞授河南府參軍遷
司農主簿以父死賊手常悲憤不仕不娶絕酒暈惠林
佛祠者燈舊墅也源依祠居闔戶日一食祠殿其先寢
也每過必趨未始踐階自營墓爲終制時時偃臥庭中
長慶初年八十矣御史中丞李德裕表薦源曰賈誼稱
守圉扞敵之臣死城郭封疆天寶時士卒伏節逆羯始
興委符組棄城郭者不爲恥而燈約義同列守位自如
抵刃就終臣節之光由燈始而源天與至孝絕心祿仕
五十餘年常守沈默理契深要一辭開析百慮洗然抱
此真節棄於清世臣竊爲陛下惜之穆宗下詔曰昔盜

起幽陵振蕩河洛贈太尉燈處難居首正色就死兩河
聞風再回危壁殊節卓焉到今稱之源有曾參之行巢
父之操泊然無營汔此高年夫褒忠所以勸臣節也旌
孝所以激人倫也鎮澆浮莫如尚義厚風俗莫如尊老
舉是四者大儆于時其以源守諫議大夫賜緋魚袋河
南尹遣官敦諭上道帝自遣使者持詔書袍笏卽賜又
賜絹二百匹源頓首受詔謂使者伏疾年老不堪趨拜
卽附表謝辭吐哀慙一無受尋卒敬宗時擢燈孫爲河
南兵曹參軍

彭擢明經第天寶中選名臣子可用者自咸寧丞遷右

補闕從天子入蜀後愷數年卒有孫景讓景莊景溫別傳武德功臣十六人貞觀功臣五十三人至德功臣二百六十五人德宗即位錄武德以來宰相及實封功臣子孫賜一子正員官史館考勲名特高者九十二人以三等條奏第一等以其歲授官第二等以其次年第三等子孫數訟於朝有詔差爲二等增至百八十七人每等武德以來宰相爲首功臣次之至德以來將相又次之大中初又詔求李峴王珪戴胄馬周褚遂良韓瑗郝處俊婁師德王及善朱敬則魏知古陸象先張九齡裴寂劉文靜張柬之袁恕已崔玄暉桓彥範劉幽求鄭元

振房瑄袁履謙李嗣業張巡許遠盧弈南霽雲蕭華張鎬李勉張鎰蕭復柳渾賈耽馬燧李愷三十七人畫像續圖凌煙閣云

司空太子太傅知門下省事梁國公房玄齡

尚書右僕射檢校侍中萊國公杜如晦

太子太保同中書門下三品宋國公蕭瑀

開府儀同三司同中書門下三品知政事上柱國申國

公高士廉

太子太師知政事特進鄭國公魏徵

侍中永寧郡公王珪

吏部尚書參預朝政道國公戴胄

中書令江陵縣子岑文本

中書令兼太子左庶子檢校吏部尚書高唐縣公馬周
侍中兼太子左庶子檢校吏部禮部民部尚書事清苑
縣男劉洎

尚書右僕射同中書門下三品河南郡公褚遂良

太子太師同中書門下三品燕國公于志寧

尚書右僕射同中書門下三品兼太子少傅北平縣公
張行成

中書令行侍中兼太子少保脩縣公高季輔

侍中兼太子賓客襲潁川縣公韓瑗

中書令兼太子詹事南陽縣侯來濟

侍中兼太子賓客張文瓘

侍中甌山縣公郝處俊

中書侍郎同中書門下三品兼太子右庶子酒泉縣公
李義琰

內史河東縣侯裴炎

文昌左相同鳳閣鸞臺三品溫國公蘇良嗣

內史梁國公狄仁傑

納言檢校并州大都督府長史天兵軍大總管隴右諸

軍大使譙縣子婁師德

鳳閣侍郎同鳳閣鸞臺平章事石泉公王方慶

文昌左相同鳳閣鸞臺三品襲邢國公王及善

尚書右僕射兼中書令知兵部尚書事齊國公魏元忠

紫微令梁國公姚崇

正諫大夫同鳳閣鸞臺平章事朱敬則

尚書左僕射同中書門下平章事許國公蘇瓌

吏部尚書兼侍中廣平郡公宋璟

黃門監梁國公魏知古

中書侍郎同中書門下平章事充國公陸象先

紫微侍郎同紫微黃門平章事許國公蘇頌

中書令河東縣侯張嘉貞

中書侍郎同中書門下平章事清水縣公李元紘

黃門侍郎同中書門下平章事宜陽縣子韓休

中書令始興縣伯張九齡

司空河東郡公裴寂

納言上柱國魯國公劉文靜

太尉檢校中書令同中書門下三品揚州大都督趙國

公長孫無忌

禮部尚書河間郡王孝恭

尚書右僕射檢校中書令行太子左衛率上柱國衛國公李靖

司空兼太子太師英國公李勣

開府儀同三司鄜州都督鄂國公尉遲敬德

左光祿大夫洛州都督蔣國公屈突通

陝東道大行臺吏部尚書鄖國公殷開山

衛尉鄉夔國公劉弘基

澤州刺史邳國公長孫順德

民部尚書上柱國莒國公唐儉

右驍衛大將軍駙馬都尉譙國公柴紹

右驍衛大將軍襄國公段志玄

洪州都督渝國公劉政會

左武侯將軍相州都督郟國公張公謹

右武衛大將軍盧國公程知節

左武衛大將軍上柱國胡國公秦叔寶

弘文館學士祕書監永興縣公虞世南

右衛大將軍兼太子右衛率工部尚書武陽縣公李大

亮

右武衛大將軍邢國公蘇定方

夏官尚書同中書門下三品清邊道行軍總管耿國公

王孝傑

中書令漢陽郡公張柬之

中書令博陵郡公崔玄暉

侍中平陽郡公敬暉

侍中燕國公桓彥範

中書令南陽郡公袁恕已

右武衛大將軍同中書門下三品韓國公張仁愿

尚書左丞相兼黃門監徐國公劉幽求

黃門侍郎參知機務脩文館學士齊國公崔日用

兵部尚書同中書門下三品代國公郭元振

尚書左丞相兼中書令集賢院學士燕國公張說

紫微侍郎上柱國趙國公王珣

兵部尚書同中書門下三品持節朔方軍節度大使中

山郡公王駿

尚書左僕射同中書門下平章事兼河南江淮副元帥

東都留守冀國公裴冕

文部尚書同中書門下平章事清河縣公房琯

門下侍郎同中書門下平章事衛國公杜鴻漸

鎮西北廷行營節度使開府儀同三司衛尉卿兼懷州

刺史虢國公李嗣業

平盧軍節度使柳城郡太守劉正臣

恒州刺史衛尉少卿兼御史中丞顏杲卿

常山郡太守袁履謙

河南節度副使左金吾衛將軍檢校主客郎中兼御史

中丞張巡

睢陽郡太守兼御史中丞許遠

御史中丞留臺東都知武選盧弈

睢陽郡太守特進左金吾衛將軍南霽雲

右第一

內史令延安郡公竇威

將作大匠判納言陳國公竇抗

侍中兼太子左庶子江國公陳叔達

納言觀國公楊恭仁

判吏部尚書參議朝政安吉郡公杜淹

中書令虞國公溫彥博

中書侍郎檢校刑部尚書參知機務崔仁師

中書令兼檢校太子詹事上柱國安國公崔敦禮

戶部尚書平恩縣公許圜師

兵部尚書同中書門下三品俱江道行軍總管任雅相

度支尚書同中書門下三品范陽郡公盧承慶

西臺侍郎同東西臺三品兼弘文館學士楚國公上官儀右相廣平郡公劉祥道

左侍極兼檢校左相嘉興縣子陸敦信

文昌左相同鳳閣鸞臺三品樂城縣公劉仁軌

荊州大都督府長史安平郡公李安期

尚書右僕射同中書門下三品兼太子賓客襲道國公戴至德

司列少常伯太子右中護兼正諫大夫同東西臺三品

趙仁本

中書令趙國公李敬玄

中書令兼太子左庶子薛元超

中書令同中書門下一品崔知溫

侍中同中書門下三品襲廣平郡公劉齊賢

納言樂平縣男王德直

地官尚書檢校納言鉅鹿縣男魏玄同

文昌左相同鳳閣鸞臺三品特進輔國大將軍鄧國公

岑長倩

鳳閣侍郎同鳳閣鸞臺三品臨淮縣男劉禕之

納言博昌縣男韋思謙

地官尚書同鳳閣鸞臺平章事格輔元

唐書卷一百一十一 列傳 二十三
司禮卿判納言事渤海縣子歐陽通

內史李昭德

鸞臺侍郎同鳳閣鸞臺平章事陸元方

鳳閣侍郎同鳳閣鸞臺三品杜景佺

尚書右僕射兼太子賓客同中書門下三品鄖國公韋

安石

左散騎常侍同中書門下三品知東都留守趙郡公李

懷遠

中書令逍遙公韋嗣立

守侍中同中書門下三品兼太子右庶子常山縣男李

日知

檢校黃門監漁陽縣伯盧懷慎

中書令左丞相兼侍中安陽郡公源乾曜

黃門侍郎同紫微黃門平章事魏縣侯杜暹

侍中趙城侯裴耀卿

左武衛大將軍開府儀同三司淮安王神通

特進大常卿江夏王道宗

荊州都督周國公武士護

右屯衛大將軍檢校晉州都督總管譙國公竇琮

少府監葛國公劉義節

右光祿大夫羅國公張平高

洛州都督右衛大將軍鄴國公竇軌

夔州都督息國公張長孫

金紫光祿大夫夷國公李子和

左監門衛大將軍檢校右武候將軍榮國公樊興

左監門衛大將軍果國公錢九隴

右驍衛大將軍歸國公安興貴

右武衛大將軍申國公安脩仁

殿中監郢國公宇文士及

右武衛大將軍沔陽郡公公孫武達

荊州都督懷寧郡公杜君綽

右驍衛將軍濮國公龐卿暉

代州都督同安郡公鄭仁恭

右翊衛將軍遂安郡公李安遠

幽州都督歷陽郡公獨孤彥雲

始州刺史左屯衛大將軍襄武郡公劉師立

右威衛大將軍濟東郡公李孟嘗

右監門衛大將軍河南縣公元仲文

右監門衛將軍廬陵郡公秦師行

左領軍大將軍新興公馬三寶

右衛大將軍駙馬都尉畢國公阿史那社尒
鎮軍大將軍號國公張士貴

左衛大將軍琅邪郡公牛進達

鎮軍大將軍嘉川郡公周護

陝州刺史天水郡丘行恭

潭州都督吳興郡公沈叔安

散騎常侍豐城縣男姚思廉

太子少師同中書門下三品特進朔方道行軍大總管

宋國公唐休璟

左羽林軍大將軍遼陽郡王李多祚

左領軍大將軍趙國公李湛

刑部尚書太子賓客魏國公楊元琰

殿中監兼知總監汝南郡公翟無言

冠軍大將軍左羽林軍大將軍光祿卿天水縣公趙承恩

將作大匠裴思諒

右羽林軍將軍弘農郡公楊執一

左衛將軍河東郡公薛思行

光祿卿駙馬都尉琅邪郡公王同皎

中書令越國公鍾紹京

太僕卿立節郡王薛崇簡

右金吾衛大將軍涼國公李延昌

太子中允同正冀國公馮道力

少府監趙國公崔諤之

左監門衛中候光祿卿申國公許輔乾

左金吾衛大將軍鄧國公張暉

朔方道行軍大總管左羽林軍大將軍平陽郡公薛訥

河南副元帥太尉兼侍中臨淮郡王李光弼

河東節度副大使守司空兼兵部尚書霍國公王思禮

左相幽國公韋見素

太保韓國公苗晉卿

中書令趙國公崔圓

太源節度使檢校尚書左僕射同中書門下平章事金

城郡王辛雲京

河西隴右副元帥兵部尚書同中書門下平章事涼國

公李抱玉

太子太師檢校尚書右僕射知省事信都郡王田神功

四鎮北庭涇源節度使檢校尚書左僕射知省事扶風

郡王馬璘

左羽林軍大將軍檢校戶部尚書兼御史大夫薛景仙

右散騎常侍檢校禮部尚書兼御史大夫尚衡

太原尹兼御史大夫北都留守河東節度副大使南陽

郡公鄧景山

河東節度副使兼鴈門郡太守光祿卿賈循

禮部尚書東京留守酒泉縣侯李愷

東平郡太守姚閭

右第二

盧弈黃門監懷慎少子也疏眉目豐下謹重寡欲斤斤自脩與兄奐名相上下而剛毅過之天寶初爲鄆令所治輒最積功擢給事中拜御史中丞自懷慎奐及弈三

居其官清節似之時傳其美俄留臺東都兼知武部遷安祿山陷東都吏亡散弈前遣妻子懷印間道走京師自朝服坐臺被執將殺之卽數祿山罪除顧賊徒曰爲人臣者當識逆順我不陷失節死何恨觀者恐懼弈臨刑西向再拜而辭罵賊不空口逆黨爲變色肅宗詔贈禮部尚書下有司諡時以爲洛陽亡操兵者任其咎執法吏去之可也委身寇讎以死誰對博士獨孤及曰苟息殺身於晉不食其言也玄冥勤其官水死守位忘躬也伯姬待姆而火死先禮後身也彼死之日皆於事無補然則祿山亂大於里丕弈廉察之任切於玄冥之官

分命所繫不啻保姆逆黨兵威烈於水火于斯時也能與執干戈者同其戮力挽之不來推之不去全操白刃之下孰與夫懷安偷生者同其氣請諡曰貞烈詔可子杞別有傳杞子元輔

元輔字子望少以清行聞擢進士補崇文校書郎杞死德宗念之不忘拜元輔左拾遺歷杭常絳三州刺史課當最召授吏部郎中進累兵部侍郎為華州刺史卒元輔端靜介正能紹其祖故歷顯劇而人不以杞之惡為累云

張介然者猗氏人本名六朗性慎愿長計畫始為河隴

支郡太守王忠嗣皇甫惟明哥舒翰踵領節度並署營田支度等使入奏稱旨賜與良渥介然啓曰臣位三品當給棨戟若列於京師雖富貴不為鄉人知願得列戟故里玄宗許之別賜戟京師第門仍賜絹五百匹宴閭里長老本鄉得列戟自介然始翰薦為少府監歷衛尉卿祿山反授河南節度採訪使守陳留陳留據水陸劇居民羣夥而太平久不知戰介然到屯不三日賊已度河車騎蹂躪騰煙塵漫數十里日為奪色士聞鉦鼓聲皆褫氣不能授甲凡旬六日城陷初有詔購賊首而暴誅慶宗狀祿山入陳留見詔書拊膺大哭曰我何罪吾子

亦何罪乃殺之卽大恚憤殺陳留降者萬人以暹血流
成川斬介然於軍門以僞將李廷望爲節度使守陳留
祿山已拔陳留則鼓而前無敢亢中宿攻滎陽太守崔
無諛率衆乘城聞師譟自墜如雨無諛與官屬皆死賊
手以僞將武令珣戍焉無諛者本韋后外家博陵舊望
也始無諛娶蕭至忠女至忠敗被貶父乃爲益州司馬
素善楊國忠旣用事引爲少府監守滎陽有詔贈禮部
尚書諡曰毅勇。

唐書卷一百九十一

